

社121
673
部五:86



文獻通考卷第三百三十六



鄯陽馬端臨貴與著

四裔考十三

西域總序

西域以漢孝武時始通本三十六國皆在匈奴之西烏孫之南南北有大山中央有河東西六千餘里東則接

漢阨以玉門陽關二關並在西則限以葱嶺諸國大率

土著有城郭田畜與烏孫異故皆役屬匈奴西邊日逐

王領西域賦稅取足焉其南山東出金城今金城會寧

即漢金城郡地與漢南山屬焉屬聯自玉門陽關出西域有兩

乾隆十二年校刊

文獻通考卷第三百三十六 四裔十三

一

道西踰葱嶺則出大宛康居奄蔡焉者自張騫開西域之迹其後霍去病擊破匈奴右地降渾邪休屠王遂空其地始築令居以西今西平郡之西北初置酒泉郡後稍發徙人充實之分置武威張掖燉煌酒泉四郡據兩關焉自李廣利伐大宛之後西域震懼多遣使來貢獻於是東自燉煌西至鹽澤即蒲昌海在今交河北庭界中往往起亭障是時軍旅連出師行二三十年海內虛耗征和中貳師李廣利以軍降匈奴帝既悔遠征伐而搜粟都尉桑弘羊與丞相御史奏言故輪臺以東捷枝渠犁皆故國地輪臺渠犁地名今在交河北庭界中其地相連廣饒水草有溉田五千頃以上處溫和

田美可益通溝渠種五穀與中國同時熟田一歲有積

穀募人壯健有累重敢徙者請田所累重謂妻小家屬就畜積

爲本業益墾溉田稍築列亭連城而西以威西國帝深

陳旣往之悔乃不復出軍昭帝時乃用桑弘羊前議以

給外國使者至宣帝遣衛司馬使護鄯善以西數國及

破姑師未盡殄分以爲車師前後王及山北六國時漢

獨護南道未能盡并北道也神爵三年匈奴日逐王來

降護鄯善以西使者鄭吉迎之乃因使鄭吉併護北道

故號曰都護都護之起自吉置矣由此匈奴益弱不能

近西域於是徙屯田於北胥鞬披莎車之地屯田校尉

始屬都護都護督察烏孫康居諸外國都護治烏壘城
去陽關二千七百四十里與渠犂田官相近土地肥饒
於西域中故治焉至元帝復戊巳二校尉屯田於車師
前王庭戊巳中央鎮覆四方又開渠播種以爲厭勝故稱戊巳焉哀平間自相分割
爲五十五國凡國自譯長城長君監史大祿伯長千長
都尉且子餘渠當戶將相至侯王皆佩漢印綬凡三百
七十六人而康居大月氏安息罽賓烏弋之屬皆以絕
遠不在數中其來貢獻則相與報不督錄總領也至王
莽時四邊擾亂與中國遂絕並復役屬匈奴前往西域
有二道自元始以後有三道從玉門關出西經婁羌婁羌

遮轉西域葱嶺經懸度入大月氏爲南道從玉門關西

出發都護并迴三隴沙北頭經居盧倉從沙西北過龍

堆到故樓蘭轉西詣龜茲至葱嶺爲中道從玉門關西

北出經橫坑辟三隴沙及龍堆出五船皆到車師界戊

巳校尉所理高昌轉西與中道合龜茲新道後漢永平

中匈奴乃脅諸國共寇河西郡縣今武威張掖等郡地城門晝閉

明帝乃命將北征匈奴取伊吾廬地今伊吾縣置宜禾都尉

以屯田遂通西域于闐諸國西域自絕六十五載乃復

通焉明年始復置都護戊巳校尉及明帝崩焉耆龜茲

攻沒都護陳睦匈奴車師圍戊巳校尉章帝不欲疲敝

中國以事夷狄乃迎還戊巳校尉不復遣都護復罷屯田匈奴因遣兵守伊吾地時軍司馬班超留于闐綏集諸國和帝永光初竇憲大破匈奴因遣副使尉閻盤掩擊伊吾破之三年班超遂定西域因以超爲都護居龜茲復置戊巳校尉於是五十餘國悉納質內屬其條枝安息諸國至於海濱四萬里外皆重譯貢獻九年班超遣掾甘英窮臨西海而還皆前代所不至莫不備其風土傳其珍怪焉及班超被徵以任尚爲都護尚謂超曰猥承君後宜有以誨之超曰塞外吏士本非孝子順孫皆以罪過徙補邊屯而蠻夷懷鳥獸之心難養易敗今

君性嚴急水清無大魚察政不得下和宜蕩佚簡易寬小過總大綱而已尚不能從數年至安帝初西域背叛如超所言頻攻都護任尚段禧等朝廷以爲險遠難相應赴詔罷都護自此遂棄西域北匈奴卽復收屬諸國共爲邊患十餘歲燉煌太守曹崇請出兵擊匈奴復欲進取西域鄧太后不許但令置護西域副校尉居燉煌羈縻而已其後匈奴連與車師入寇河西漢不能禁議者因欲閉玉門陽關以絕其患尚書陳忠上疏曰臣聞八蠻之寇莫甚北虜高祖窘平城之圍文帝屈供奉之耻故孝武憤怒深惟久長之計命遣武臣浮河絕漠窮

破虜庭遂開西河四郡以隔絕南羌收三十六國斷匈奴右臂是以單于孤特竄跡遠藏由此觀之戎狄可以威服難以化狎西域內附日久區區東向叩關者數矣此其不樂匈奴慕漢之效也今北虜已破車師勢必南攻鄯善棄而不救則諸國從矣若然則虜財賄日增膽勢益殖威臨南羌與之交連如此河內四郡危矣不得不救則百倍之役興不訾之費發矣議者但念西國絕遠卹之煩費不見先代苦心勤勞之意也臣以爲燉煌宜置校尉按舊增四郡屯兵以西撫諸國庶足以折衝萬里震怖匈奴太后又召班超之子勇問之勇議曰昔

者孝武皇帝患匈奴強盛開通西域諸國論者以爲奪匈奴府藏斷其右臂遭王莽篡盜徵求無厭胡夷憤毒遂以背叛光武中興未遑外事故匈奴負強驅率諸國及至永平再攻燉煌河西郡城門晝閉帝命武臣出征西域故匈奴遠遁邊境得安及至永元莫不內屬會間者羌亂西域復絕北虜遂遣責諸國備其逋租高其價直嚴其期會鄯善車師皆懷忿怒思樂事漢其路無從前所以時有叛者皆由牧養失宜還爲其害舊燉煌郡有營兵三百人宜復之復置護西域副校尉居於燉煌如永元故事又宜遣西域長史將五百人屯樓蘭西當

焉者龜茲徑路南強鄯善于闐心膽北扞匈奴東近燉
煌如此誠便長樂衛尉鐔顯等難曰朝廷前所以棄西
域者以其無益於中國而費難供也今車師已屬匈奴
鄯善不可保信一朝反覆班將軍能保北虜不爲邊害
乎勇對曰今中國置州牧者以禁郡縣姦猾盜賊也若
州牧能保盜賊不起者臣亦願以腰斬保匈奴之不爲
邊害也今通西域則虜勢必弱虜勢弱則爲患微矣孰
與歸其府藏續其右臂哉爲置校尉以扞北撫西設長
史以招懷諸國若棄而不立則西域屈就北虜緣邊之
郡將受困苦河西城門復有晝閉之警矣今不廓開朝

廷之德而拘屯戍之費若北虜遂熾豈安邊久長之策
哉太尉屬毛軫難曰今若置校尉則西域絡繹遣使求
索無厭與之則費難供不與則失其心一朝爲匈奴所
迫當復求救則爲役大矣對曰今設以西域歸匈奴而
使其因西域租入之饒兵馬之衆以擾動緣邊是爲富
仇讐之財增暴夷之勢也置校尉者宣威布德以繫諸
國內向之心以疑匈奴覬覦之情而無費財耗國之慮
也且西域之人無他求索其來入者不過廩食而已今
若拒絕勢必北屬夷虜并力以寇并涼則中國之費不
止十億於是從忠勇議乃以勇爲西域長史將五百人

屯西柳中

今交河郡縣

勇遂破平車師自建武至於延光西

域三絕復通順帝永建二年勇復擊降焉耆於是龜茲疏勒于闐莎車等十七國皆來服從而烏孫葱嶺以西遂絕六年帝以伊吾舊膏腴之地傍近西域匈奴資之以爲鈔暴復令開設屯田如永元時事置伊吾司馬一人自陽嘉以後朝威稍損諸國驕放轉相陵伐矣自魏及晉中原多故西域朝貢不過三數國焉至後魏太武帝使董琬使西域還且言其地爲三域自葱嶺以東流沙以西爲一域姑墨以南月氏以北爲一域兩海之間水澤以南爲一域三域之內諸小渠長蓋以百數其出

西域更爲四道自玉門流沙西行二千里至鄯善爲一道自玉門度流沙北行二千二百里至車師爲一道從莎車西行一百里至葱嶺西千三百里至伽部爲一道自莎車西南五百里至葱嶺西南千三百里至波路爲一道焉於是貢獻者十有六國孝文延興中尚書奏以燉煌一鎮界遠西北寇賊路衝慮或不固欲移就涼州羣官會議給事中韓秀曰此蹙境之事非闢土之宜燉煌之立其來久矣雖土臨強寇而兵人素習縱有姦竊不能爲害循常置戍足以自全進斷北狄之覘途退塞西夷之闕路若徙就姑臧慮人懷異意或貪留重遷情

不願徙脫引寇內侵深爲國患且燉煌去涼州三千里捨遠就近防制有闕一朝廢置是啓戎心則夷狄交構互相來往恐醜徒協契竊侵涼土邊役煩興艱難方甚乃從秀議隋煬帝時遣侍御史韋節司隸從事杜行滿使於西蕃諸國至罽賓得瑪瑙杯王舍城得佛經史國得十舞女獅子皮火鼠毛而還帝復令裴矩於武威張掖間往來以引致之皆陷以厚利令轉相諷諭大業中相率而來朝者四十餘國帝因置西戎校尉以應接之自燉煌西出玉門陽關涉鄯善北通伊吾千里自伊吾北通車師前部高昌壁千二百里自高昌壁北通車師

後部金滿城

今北庭府縣

五百里此其西域之門戶內地故

漢戍已校尉更互屯焉伊吾地宜五穀桑麻蒲萄其北

及柳中皆膏腴之地故漢帝與匈奴爭車師伊吾以制

西域至隋有商胡雜居勝兵千餘人附於鐵勒人甚驍

悍厥田良沃隋末內屬置伊吾郡屬天下亂又臣突厥

唐貞觀四年以頡利破滅遂舉其屬七城來降因列其

地爲西伊州同於編戶至武太后如意初武威軍總管

王孝傑大破吐蕃復龜茲于闐疏勒碎葉四鎮自是諸

國朝貢侔於前代矣神龍以後黑衣大食強盛漸并諸

國至於西海分兵鎮守焉

杜佑族子環隨鎮西節度使高仙芝西征天寶十載至西

海寶應初因賈商船舶今之所纂其小國無異聞者則
自廣州而回著經行記諸家纂西域志多引諸僧遊歷傳記如法明
不暇錄焉遊天竺記支僧載外國事法盛歷諸國傳道
安西域志及佛國記曇勇外國傳智猛外國傳支曇諦
烏山銘翻經法師外國傳之類皆盛論釋氏詭異奇跡
參以他書則皆紀繆故多畧焉

樓蘭 卽鄯善

樓蘭在婁羌西北漢時通焉王治杆泥城去陽關千六
百里東去長安六千一百里戶千五百西北去都護治
所千八百里至山國千三百餘里此國山居故名山國西北至車
師千九百里地沙鹵少田寄田仰穀旁國國多出葭葦
檉柳胡桐白草白草牛馬所嗜也胡桐似桐蟲食其樹
而沫下流出者俗名爲胡桐淚可以汗

金人隨畜牧逐水草有驢馬多橐駝能作兵器與婁羌

同漢武帝因張騫之言甘心欲通大宛諸國一歲中多

至十餘輩樓蘭姑師當道苦之每給使者受其勞費故厭苦也攻劫漢

使王恢等漢將趙破奴率屬國騎謂諸外國屬漢者及郡兵擊

之虜樓蘭王遂破姑師於是列亭障至玉門矣樓蘭旣

降服貢獻匈奴聞發兵擊之於是樓蘭遣一子質漢後

貳師將軍擊大宛便道引兵捕樓蘭王將詣闕簿責王

對曰小國在大國間不兩屬無以自安願徙國入於漢

地上直其言遣歸國樓蘭王死後王立樓蘭國最東垂

近漢當白龍堆乏水草常主發導負米擔糧送迎漢使

又數爲吏卒所懲艾不便與漢通後復爲匈奴反間數
遮漢使昭帝遣平樂監傅介子往刺其王懸首北闕下
乃立其弟尉屠耆爲王更名其國爲鄯善王自請天子
曰身在漢久今歸單弱而前王有子在恐爲所拒國中
有伊循城其地肥美願漢遣一將屯田積穀令臣得依
其威重於是漢遣司馬一人吏士四十人田伊循以鎮
撫之其後置都尉伊循官置始此矣鄯善當漢道衝西
通且末且此七百二十里自且末以往皆種五穀土地
草木產畜作兵畧與漢同自後無聞至後魏太延時鄯
善王遣其弟入侍及太武平涼州沮渠無諱度流沙遣

其弟安周擊鄯善王王比龍恐懼欲降會魏使自天竺
劉賓至鄯善勸比龍拒之連戰安周不能克而退後比
龍懼率衆西奔且末其世子乃應安周太武討平之拜
交趾公韓杖爲假節征西將軍領護西戎校尉鄯善王
以鎮之賦役其人比之郡縣然其後部落遂役屬於且
末西魏大統八年其王允鄯來率衆內附

且末

且末國漢時通焉王治且末城去長安六千八百里戶
二百三十西北至都護治所二千二百里北接尉犁于
零東與白提西接波斯精絕南至小宛可三日行地有

葡萄諸果人皆剪髮著氊帽小袖衣爲衫則開頸而縫前多牛羊驢騾其王安末染盤梁武帝普通五年遣使貢獻謂之末國梁史云卽且末其國西北有流沙數百里夏月有熱風爲行旅之患風之欲至老駝先知卽鳴而聚立埋口鼻於沙中人每以爲候卽將氊擁蔽鼻口其風迅駛斯須過盡若不防者必致危斃

杆彌

杆彌漢時通焉王治杆彌城去長安九千三百里戶三千三百東北至都護治所三千五百里南與疎勒東北與龜茲西北與姑墨接西通于闐四百里後漢改其國

曰拘彌居寧彌城順帝永建中爲于闐王放前破殺其王與陽嘉初燉煌太守徐由遣疎勒發兵擊破于闐遂更立拘彌王靈帝熹平中又爲于闐所破掠殺殆盡衆纔千口

車師前後王

卽高昌

車師前王後王並漢時通焉前王國一曰前部治交河城今交河郡水分流繞城下故爲號去長安八千一百里戶

千五百西南至都護治所千八百里西域長史及戊己校尉並治此去燉煌十三日行其地東西三百里南北五百里四面多大山後王國治務塗谷卽今蒲城今北庭府蒲類縣也

去長安八千九百里戶六百西南至都護治所千二百三十餘里北與匈奴接初漢武帝征和四年遣重合侯馬通將諸國兵共圍車師車師王降服後其王烏貴與匈奴結親教之遮漢道昭帝時匈奴復使四千騎田車師宣帝地節二年遣侍郎鄭吉校尉司馬喜將免刑罪人田渠犁積穀欲以攻車師至秋收穀吉喜發城郭諸國兵共擊車師攻交河城破之王尙在北石城未得會吉食盡歸渠犁田至秋收後更往攻石城王乃輕騎奔烏孫吉還田渠犁及車師益積穀以安西國侵匈奴匈奴大臣皆曰車師地肥美近匈奴使漢得之多田積穀

必害我國不可不爭也遣騎來擊吉吉將田士卒保車

師城匈奴圍城數日乃解吉上書言車師去渠犁千餘

里間以山河北近匈奴漢兵在渠犁者勢不能相救願

益田卒於是召故車師太子軍宿在焉耆者立以爲王

盡徙車師國人令居渠犁遂以車師故地與匈奴車師

王得近漢田官與匈奴絕亦安樂親漢其後置戊己校

尉屯田車師故地即今交河郡漢取之以置校尉平帝元始中車師後

王國有新道出五船北通玉門關往來差近戊己校尉

徐普欲開以省道里避白龍堆之阨車師後王始句音

以道通當爲拄置心不便也拄支拄也言有所置立而支拄於已故心不便也拄

音竹 禹反 地又頗與匈奴南將軍地接其後舉國降匈奴是時王莽易匈奴單于璽單于怒大擊北邊而西域亦瓦解焉者國近匈奴先叛殺都護但欽莽不能討西域因絕至後漢和帝元光二年大將軍竇憲破北匈奴車師震懼前後王各遣子入侍其後屢叛至安帝延光四年長史班勇擊其後王軍大破之桓帝永興初後部王阿羅多攻圍漢屯田且固城殺傷吏士後部侯炭遮領餘人叛阿羅多詣漢降阿羅多從百餘騎亡走北匈奴中漢立後部故王軍就質子卑君為後部王阿羅多復從匈奴中來降於是更立阿羅多為王將卑君還燉煌以

後部人三百帳別屬役之

食其稅帳者猶中國戶數

至魏時賜其王

亦多離守魏侍中號大都尉晉以交河城為高昌郡

蓋因

其地高敞人庶昌盛立名或云昔漢武帝遣軍西討師旅頓弊者因住焉有漢時高昌壘故也

張軌呂

光沮渠蒙遜在河西皆置太守以統之後魏太武時其前部王為沮渠無諱所攻遣使上表云不能自全遂捨國東奔三分免一在焉者東界幸垂賑救魏使撫慰開

焉者倉給之文成帝末其地又為蠕蠕所并立闕伯周

為王

高昌稱王自此始

孝文太和五年高車主阿伏至羅殺闕

王以燉煌人張孟明為高昌王太和二年孟明為國人所殺立馬儒為王以鞏顧禮麴嘉為左右長史儒又通

使後魏請內屬人皆戀土不願東徙相與殺儒立嘉爲王嘉字靈鳳金城郡榆中人今郡地旣立爲王會焉耆爲嚙噠所破衆不自立請王於嘉嘉遣第二子爲焉耆王由是始大益爲國人所服其都城周回千八百四十步於坐室畫魯哀公問政於孔子之像國內有城十八置四十六鎮官有令尹有交河公田北公皆其王子也餘官多同中國大事決之於王小事世子及二公隨狀斷平章錄記事訖卽除籍書之外無久掌文案官人雖有列位並無曹府唯每朝集於衙門評議衆事諸城各有戶曹水曹田曹每城遣司馬侍郎相監檢校名爲城令

服飾丈夫從胡法婦人裙襦頭髻畧同華夏兵器有弓箭刀楯甲稍文字亦同華夏兼用胡書有毛詩論語孝經歷代子史集學官弟子以相教授雖習讀之而皆爲詩賦稅則計田輸銀無者輸麻布其刑法風俗婚姻喪葬與華夏大同其人面貌類高麗辮髮垂之於背女子亦然其地高燥多石磧氣候溫煖與益州相似穀麥再熟宜蠶多五果有草名爲羊刺其上生蜜味甚佳赤鹽如朱白鹽如玉多葡萄酒俗事天神兼信佛法國中羊馬牧於隱僻以避外寇非貴人不知其所又有草實如繭中絲如細纒名爲白疊子國人取織以爲布交市用

焉其國北有赤石山山北七十里有貪汗山夏有積雪
此山之北鐵勒界也從武威西北有捷路度砂磧千餘
里四面茫然無有蹊徑欲往者不可準記唯以人畜骨
骸及駝糞爲驗路中或聞歌哭之聲行人尋之多致亡
失蓋魍魎魍魎也故商旅往來多取伊吾路魏孝文以
來朝貢不絕孝明時遣使奉表自以邊遐不習典誥求
借五經諸史并請國子助教劉燮以爲博士許之嘉死
子堅立後關中賊亂使命遂絕梁大同中遣使南奉方
物普泰初遣使朝貢後遂隔絕至大統十四年詔以其
世子元嘉爲王恭帝二年又以田北公茂嗣位武成元

年其王遣使貢方物保定初又遣使來貢隋文帝開皇
中突厥破其四城有二千人來歸中國嘉孫伯雅立其
大母本突厥可汗女其父死突厥令依其俗伯雅不從
突厥逼而從之煬帝大業五年伯雅來朝因從擊高麗
還尚宗女華容公主八年歸蕃唐武德中遣使獻狗雌
雄各一高六寸長尺餘性甚惠能牽馬銜燭云本生拂
菥國其後不供職貢貞觀四年其王文泰來朝伯雅子後
與西突厥連結諸國朝貢者路出高昌文泰稍擁絕之
至十三年太宗謂其使曰高昌數年來朝貢脫畧我使
人至彼文泰云鷹飛於天雉竄於蒿猫遊於堂鼠安於

穴各得其所豈不快邪明年當發兵以擊汝國十四年
拜侯君集爲交河道大管總發兵討之羣臣諫以行萬
里兵難得志且天界絕域雖得之不可守不從文泰謂
左右曰曩吾入朝見秦隴北城邑蕭條非有隋比今伐
我兵多則糧輸不逮若下三萬我能制之度積疲鈍以
逸待勞卧收其弊耳及聞王師至磧口悸駭無他計發
病死子智盛立君集以兵傅其城智盛降乃下其郡三
縣五城三十二戶八千四十六口萬七千七百三十馬
四千三百匹以其地爲西州以交河城爲交河縣始昌
城爲天山縣田北城爲柳中縣東鎮城爲蒲昌縣高昌

城爲高昌縣初西突厥遣其葉護屯兵於可汗浮圖城
與高昌爲影響至是懼而來降以其地爲庭州并置蒲
類縣每歲調內地更發千人鎮遏焉黃門侍郎褚遂良
諫曰古者先函夏後夷狄務先德化不爭荒逖今高昌
誅滅威動四夷然自王師始征河西共役飛米轉芻十
室九匱五年未可復今又歲遣屯戍行李萬里去者資
裝使自營辦賣菽粟傾機杼道路死亡尚不可計所遣
罪人始於犯法終於惰業無益行陣復有亡命官司捕
逮株蔓相牽有如張掖酒泉塵飛烽舉豈得高昌一乘
一卒及事乎必發隴右河西耳然則河西爲我腹心高

昌他人手足也何必耗中華事無用昔陛下平頡利吐谷渾者皆爲立君蓋罪而誅之服而立之百蠻所以畏威慕德也今宜擇高昌可立者立之召首領悉還本土長爲蕃翰中國不擾書奏不省焉者請歸高昌所奪五城留兵以守君集勒石紀功凱旋徙高昌豪傑於中國智盛拜左武衛將軍金城郡公弟智湛右武衛中郎將天山郡公麴氏傳國九世百三十四年而亡智湛麟德中以左驍衛大將軍爲西州刺史卒有子昭好學有鬻異書者母顧笥中金歎曰何愛此不使子有異聞乎盡持易之昭歷司膳卿頗能詞章弟崇裕有武藝永徽中

爲右武衛翊府中郎將封交河郡王邑至三千戶終鎮軍大將軍武后爲舉哀賻襚甚厚封爵遂絕安史之亂其地陷沒復自爲國語訛亦曰高敞然其地頗有回鶻故亦謂之回鶻宋建隆三年四月西州回鶻阿都督等四十二人以方物來貢乾德三年西州回鶻可汗遣僧法淵獻佛牙琉璃器琥珀盞太平興國六年其王始稱西州外生師子王阿厮蘭漢遣都督麥溫來獻五月遣供奉官王延德等使高昌景德元年又遣使金延福來貢

王延德使還叙其行程來上云初自夏州歷玉亭鎮

次歷黃羊度沙磧無水行人皆載水凡二日至都囉
囉族漢使過者遺以財寶謂之打當次歷第女嗚子
族族臨黃河以羊皮爲囊吹氣實之浮於水或以橐
駝牽木棧而渡次歷茅女王子開導族行入六窠砂
砂深三尺馬不能行行者皆乘橐駝不育五穀砂中
生草名登相收之以食次歷樓子山無居人行砂磧
中以日爲占旦則背日暮則向日日中則止夕行望
月亦如之歷卧梁勃特族地有都督山唐回鶻之地
次歷大蟲太子族族接契丹界人衣尚錦綉器用金
銀馬乳釀酒飲之亦醉次歷屋地因族蓋達于于越

王子之子次至達于于越王子族此九族達鞏中尤
尊者次歷拽利王子族有合羅川唐回鶻公主所居
之地城基尚在有湯泉之地傳云契丹舊爲回鶻牧
牛回鶻徙甘州契丹達鞏遂各爭長攻戰次歷阿墩
族經馬綜山望鄉嶺上石庵李陵題字處次歷格囉
美源西方百川所會極望無際鷗鷺鳧雁之類甚衆
次至托邊城亦名李僕射城城中首領號通天王次
歷小石州次歷伊州州將陳氏其先自唐開元二年
領州凡數十世唐時詔敕尚在地有野蠶生苦參上
可爲錦帛有羊尾重者三斤小者一斤肉如熊白而

甚美又有礪石剖之得實鐵謂之喫鐵石又生胡桐
樹經雨卽生胡桐律次歷益都次歷納職城在大患
鬼魅積之東南望玉門關甚近無水草載糧以行凡
三日至鬼谷口避風驛用本俗法試茶出詔押禦風
風乃息凡八日至驛田寺高昌聞使至遣人來迎次
歷地名寶莊又歷六鍾乃至高昌卽西州也其地南
距于闐西南距大食波斯西距西天步露沙雪山葱
嶺皆數千里地無雨雪而極熱每盛暑居人皆穿地
爲穴以處飛鳥羣萃河濱或起飛卽爲日氣所燦墜
而傷翼屋宇覆以白堊開寶三年雨及五寸卽廬舍

多壞有水出金嶺導之周繞國城以溉田園作水磴
地產五穀惟無蕎麥貴人食馬餘食羊及鳧鴈樂多
琵琶箜篌出貂鼠白氍繡文花藥布俗好騎射婦人
戴油帽謂之蘇幕遮用開元七年歷以三月九日爲
寒食餘二社冬至亦然以銀或鍮石爲筒貯水激以
相射或以水交潑爲戲謂之壓陽氣去病好游賞行
者必抱樂器佛寺五十餘區皆唐朝所賜額寺中有
大藏經唐韻玉篇經音等居民春月多羣聚遊樂於
其間游者馬上持弓矢射諸物謂之禳災有敕書數
藏唐太宗明皇御札詔勅緘鎖甚緊復有摩尼寺波

斯僧各持其法佛經所謂外道者也所統有南突厥
北突厥大衆慰小衆樣磨割祿點曼司永蠻格哆族
豫龍族之名甚衆國中無貧民絕食者共振之人多
壽考率百餘歲絕無夭死時四月師子王避暑於北
庭以其舅阿多于越守國先遣人致意於延德曰我
王舅也使者拜我乎延德曰持朝命來禮不當拜復
問曰見王拜乎延德曰禮亦不當拜阿多于越復數
日始相見然其禮頗恭師子王邀延德至其北庭歷
交河州凡六日至金嶺口寶貨所出又兩日至漢家
寨又五日上金嶺過嶺卽多雨雪嶺上有龍堂刻石

記云小雪山也嶺上有積雪行人服毛罽度嶺一日
至北庭憇高臺寺其王烹羊并馬以具膳尤豐潔地
多馬王及王后太子各養馬牧放於平川中彌亘百
餘里以毛色分別爲羣莫知其數北庭川長廣數千
里鷹鷂鷓鴣之所生多美草下生花砂鼠大如鸚鵡
禽捕食之其王遣人來言擇日以見使者願無訝其
淹久至七日見其主王及王子侍者皆東向拜受賜
旁有持磬者擊以節拜王聞磬聲乃拜旣而王之兒
女親屬皆出羅拜以受賜遂張樂飲宴爲優戲至暮
明日泛舟於池中池四面作鼓樂又明日遊佛寺曰

應運泰寧之寺貞觀十四年造北庭北山中出礪砂
山中常有煙氣涌起而無雲霧至夕光焰若炬火照
見禽鼠皆赤采礪砂者着木底鞵若皮爲底者卽焦
下有穴生青泥出穴外卽變爲砂石土人取以治皮
城中多樓臺卉木人白皙端正性工巧善冶金銀銅
鐵爲器及攻玉善馬直絹一疋其駑馬充食者纔直
一丈貧者皆食肉西抵安西卽唐之西境七月令延
德先還其國其王始至亦聞有契丹使來使缺唇以
銀葉蔽之謂其王云聞漢遣使入達靺而道出王境
誘王窺邊宜早送至達靺無使久留因云高敞本漢

土漢使來覘視封域將有異圖王當察之延德偵知
其語因謂王曰犬戎素不順中國今乃反間我欲殺
之王固勸乃止自六年五月離京師七年四月至高
昌所歷以詔賜諸蕃君長襲衣金帶繒帛八年春與
其謝恩使凡百餘人復循舊路而還雍熙元年四月
至京師延德初至達靺之境頗見晉末陷虜者之子
孫咸相率遮迎獻飲食問其鄉里親戚意甚悽感留
旬日不得去延德之所述云

龜茲

龜茲

一曰邱茲
又曰屈茨

漢時通焉王治延城

今名伊羅盧城都白山之

南二百里

隋西域圖云白山一名阿羯山常有火及煙卽出硃砂之所

東去長安七

千五百里戶七千南與精絕東南與且末西南與杆彌北與烏孫西與姑墨接能冶鑄俗有城郭東至都護治所烏壘城四百里烏壘戶百十與都護同治其南三百里至渠犂東北與尉犂東南與且末南與精絕接昭帝田輪臺與渠犂地皆相連也晉武帝時其王遣子入侍惠懷末以中國亂遣使貢方物於張重華苻堅堅遣其將呂光伐之其王白純距境不降光進軍討平之立其後白震爲王其所居城方五六里城三重中有佛塔千所其刑法殺人者死劫賊則斷其一臂并刖一足賦稅

準地徵租無田者則稅銀風俗婚姻喪葬物產與焉耆

略同唯氣候少溫爲異又出細瑣饒銅鐵鉛麋皮氍毹

沙鹽綠雌黃胡粉安息香良馬羣牛等東有輪臺卽漢

李廣利所屠者其南二百里有大河東流號計戍水卽

黃河也東去焉耆九百里南去于闐一千四百里西去

疏勒一千五百里北去突厥牙六百里東南去瓜州三

百里其東關城屯寇竊非一魏太武詔將軍萬度歸率

騎一千以擊之龜茲遣烏羯目提等領兵三千拒戰度

歸擊斬之斬二百餘級大獲駝馬而還俗性多淫置女

市收男子鐵以入官土多孔雀羣飛山谷間人取而食

之孳乳如雞鶩其王家恒有千餘隻云其國西北大山中有如膏者流出成川行數里入地狀如餹餈甚臭服之齒髮已落者能令更生癘人服之皆愈自後每使朝貢周保定元年其王遣使來獻隋大業中其王白蘇尼咿遣使朝貢方物是時其國勝兵可數千人唐高祖受禪其王遣使入貢貞觀四年獻馬帝賜璽書撫慰後臣西突厥郭孝恪伐焉耆乃遣兵與焉耆應援自是不朝貢二十一年兩遣使入朝貢帝怒其佐焉耆叛乃以阿史那社爾爲崑邱道行軍大總管部兵十萬討之社爾凡破五大城俘男女數萬遣使者諭降小城七百餘西

域震懼社爾乃立王弟葉護王其國勒石紀功始徙安西都護於其都統于闐碎葉疏勒號四鎮高宗復封訶黎布失畢爲龜茲王與其降王還國後爲降王所拒復發兵討誅之以其地爲龜茲都督府更立子素稽爲王是歲徙安西都護於其國以故安西爲西州都督府治儀鳳時吐蕃攻焉耆以西四鎮皆沒長壽元年武威道總管王孝傑破吐蕃復四鎮地置安西都護府於龜茲以兵三萬鎮守於是沙磧荒絕民供貲糧甚苦議者請棄之武后不聽都護以政績稱者田揚名郭元振張孝嵩杜暹云開元七年王白莫宓死子多市立改名孝節

十八年遣弟孝義來朝自龜茲贏六百里踰小沙磧有
跋祿迦小國也一日亟墨卽漢姑墨國橫六百里縱三
百里風俗文字與龜茲同言語少異出細氊褐西三百
里度石磧至凌山葱嶺北原也水東流春夏山谷積雪
西北五百里至素葉水城比國商胡雜居素葉以西數
十城皆立君長役屬突厥自素葉水城至羯霜那國衣
氈褐皮氈以繒繚額素葉城西四百里至千泉地贏二
百里南雪山三垂平陸多泉池因名之突厥可汗歲避
暑其中羣羆鹿飾鈴環可狎也西贏百里至咀邏私城
亦比國商胡雜居有小城三百本華人爲突厥所掠羣

保此尚華語西南贏二百里至泉城原隰膏腴南五十
里有笈赤建國廣千里地沃宜稼多葡萄又二百里卽
石國宋大中祥符三年龜茲王可汗遣使貢方物天禧
四年又入貢自天聖至景祐四年龜茲入貢者五最後
賜以佛經一藏其國主自稱師子王衣黃衣寶冠與宰
相九人同治國事其國西至大食國六十日行東至夏
州九十日行或稱西州回鶻或稱西州龜茲或稱龜茲
回鶻熙寧四年五年俱入貢紹聖三年使大首領阿連
撒羅等三人以表章及玉佛至洮西熙河經畧使以其
罕通使請令於熙泰等州博買而估所賣物價答賜遣

還從之

且彌

西且彌國王治天山東於太谷在車師北本屬役車師去長安八千六百七十里戶三百三十二口千九百二十六勝兵七百八十三人西且彌侯左右將左右騎君各一人西南至都護治所四百八十里東且彌國王治天山東兌虛谷去長安八千二百五十里戶百九十一口千九百八十四勝兵五百七十二人東且彌侯左右都尉各一人西南至都護治所千五百八十七里

焉耆

焉耆漢時通焉王治員渠城在白山之南七十里去長安七千三百里戶四千西南都護治所四百里南去尉

犁百里北與烏孫接東去交河城

唐郡

九百里西去龜茲

九百里皆沙磧其國近海水多魚鹽蒲葦之利四面有大山道險阨易守海水曲入四山之內周匝其城三十餘里後漢明帝永平末有戶萬五千與龜茲共攻沒都護陳睦至和帝永光六年都護班超發諸國兵討之殺其王超乃立焉耆左侯元孟爲王至安帝時西域背叛延光中超子勇爲西域長史復討定之晉武帝太康中其王龍安遣子入侍安夫人糴胡之女糴古邁反姪身十二

月剖脇生子曰會立爲世子會少而勇傑安病篤謂會曰我嘗爲龜茲王白山所辱汝能雪之乃吾子也及會立襲滅白山遂據其國遣子熙歸本國爲王會有膽氣籌略遂霸西域葱嶺以東莫不率服其俗丈夫剪髮婦人衣襦著大褲婚姻同華夷兵有弓刀甲稍死亡者皆焚而後葬其服制滿七日則除之俗事天神氣候寒土田良沃穀有稻粟菽麥畜有駝馬牛羊養蠶不以爲絲唯取纊綿俗尚葡萄酒兼愛音樂其後張駿遣沙州刺史楊宣率衆經理西域宣以部將張植爲前鋒軍次其國進屯鐵門未至十餘里熙又率衆先要之於遮留谷

植將至或曰漢祖畏於栢人岑彭死於彭亡谷名遮留殆將有伏單騎嘗之果有伏發植擊敗之進據尉犁熙降於宣呂光僭位熙遣子入侍至魏遣成周公萬度歸討之其王尸鳩卑那衆大潰單騎走入山中度歸進屠其城四部諸戎皆降服焉耆爲國斗絕一隅不亂日久獲其珍奇異玩殊方詭譎難名之物橐駝馬牛雜畜鉅萬至後周武帝保定四年其王遣使獻名馬隋煬帝大業中其王龍突騎遣使貢方物唐貞觀六年龍突騎遣使來朝自隋亂磧路閉故西域朝貢皆道高昌突騎支請開大磧道以便行人帝許之高昌怒大掠其邊西突

厥復攻之與高昌陷其五城掠千五百人焚廬舍遣使
言狀詔侯君集討高昌突騎支引兵佐唐高昌破歸向
所俘及城遣使入謝其後與西突厥相約爲輔車勢不
朝貢乃命安西都護郭孝恪討之傳其城執突騎支更
以栗婆準攝國事後其從兄薛婆阿那支自爲王執栗
婆準獻龜茲殺之阿史那社爾討龜茲擒阿那支斬以
徇立突厥支弟婆伽利爲王以其地爲焉耆都督府婆
伽利死國王請還前王突騎支許之歸國死龍嬾突立
開元七年龍嬾突死吐拂延立訖天寶常朝貢其後盡
并有漢時尉犁危須山國三國之地并鄯善之北界矣

文獻通考卷第二百三十六

乾隆十二年校刊

文獻通考卷第二百三十六 四裔十二

三七

文獻通考卷第三百三十七

鄯陽馬端臨貴與著

四裔考十四

于闐

于闐漢時通焉都葱嶺之北二百餘里去長安九千七
百里戶三萬二千東北至都護治所三千九百里南與
婁羌接北與姑墨接東北去龜茲千四百里東去鄯善
千五百里西通皮山國四百里去東朱俱波國千里西
北至踈勒國千五百里其國之西水皆流注西海其東
水東注鹽澤即蒲昌海國有阿耨達山據漢書河源出焉首名

拔河亦名樹拔河或云卽黃河也此海七百里入計戊
水一名計首水卽葱嶺南河同入鹽澤或云阿耨達卽

崑崙山 風俗物產與龜茲畧同後漢建武末莎車王賢強

盛攻并于闐徙其主俞林爲驪歸王以莎車將軍居德
爲于闐王明帝永平中居德死後于闐將休莫霸自立
爲王休莫霸死兄子廣德立後遂滅莎車其國轉強盛
從精絕西北至踈勒十三國皆服從而鄯善王亦始強
盛自是南道自葱嶺以東唯此二國爲大順帝時遣侍
子詣闕貢獻元嘉時漢所遣長史王敬入于闐矯詔殺
其王建爲于闐將輸熒等所殺將討之後竟不能出兵
于闐恃此遂驕後魏真君中太武討吐谷渾慕利延慕

利延遂西入于闐殺其王死者甚衆獻文末蠕蠕寇于
闐于闐遣使上表曰西方諸國今皆已屬蠕蠕奴世奉
大國至今無異故遣使奉獻遙望救援自後每使朝獻
梁武帝時凡四遣使通江左獻方物及琉璃鬘刻玉佛
周建德三年遣使獻名馬隋大業中頻遣使朝貢時其
王姓王氏錦帽金裝冠髮不令人見俗云見王髮年必
儉國地方亘千里所都城方八九里部內有大城五小
城數十山多美玉有好馬駝騾其刑法與中國畧同風
俗物業與龜茲同俗重佛法寺塔僧尼甚衆王尤信尚
每設齋日必親自洒掃饋食于闐西五百里有比摩寺

云是老子化胡成佛之所

云老子至此白日昇天與羣胡辭訣言我暫游天上尋當

下生其後出天竺國化為胡王太子自稱曰佛因立此寺俗無禮義多盜賊淫縱自

高昌以西諸國人等深目高鼻唯此一國貌不甚胡頗類華夏其後并有漢戎盧杆彌渠勒皮山精絕五國故地其居曰西山城勝兵四千人有玉河國人夜視月光盛處必得美玉王居繪室俗機巧言迂大喜事祇神浮屠法然貌恭謹相見皆跪以木爲筆玉爲印凡得問遺書戴於首乃發之自漢武帝以來中國詔書符節其王傳以相授人喜歌舞工紡織西有沙磧鼠大如蝟色類金出入羣鼠爲從初無桑蠶丐鄰國不肯出其王卽求

婚許之將迎乃告曰國無帛可持蠶自爲衣女聞置蠶帽絮中關守不敢驗自是始有蠶女刻石約無殺蠶蛾飛盡得治繭王姓尉遲氏名屋密本臣突厥唐貞觀六年遣使者入獻後三年遣子入侍阿史那社爾之平龜茲也其王伏闍信大懼使子獻橐駝三百其後隨使者入朝請以子弟宿衛上元初身率子弟酋領七十人來朝擊吐蕃有功帝以其地爲毗沙都督府析十州授伏闍雄都督死子璿立開元時獻馬駝豹璿死復立尉遲伏師戰爲王死伏闍達嗣立死子珪嗣珪死子勝嗣至德初以兵赴難因留宿衛乾元三年以其弟葉護曜權

知本國事以後絕不復至晉天福三年其王李聖天自稱唐之宗屬遣使來貢高祖遣供奉官張匡鄴高居誨等入其國冊聖天爲大寶于闐國王匡鄴等自靈州行二年至于闐七年乃還頗記其往來所見山川而不能道聖天世次也

居誨記曰自靈州過黃河行三十里始涉沙入党項界曰細腰沙神樹沙至三公沙宿月支都督帳自此沙行四百餘里至黑堡沙沙尤廣遂登沙嶺沙嶺党項牙也其酋曰捨崖天子渡曰亭河至涼州涼州西行五百里至甘州甘州回鶻牙也其南山百餘里漢

小月支之故地也有別族號鹿角山沙陀云朱邪氏之遺族也自甘州西始涉磧磧無水載水以行甘州人教晉使者作馬蹄木澁四竅馬蹄亦作四竅而綴之駝蹄則包以釐皮乃可行西北五百里至肅州渡金河西百里出天門關又西百里出玉門關經吐蕃男子冠中國帽婦人辮髮戴瑟瑟云珠之好者一珠易一良馬西至瓜州沙州二州多中國人聞晉使者來其刺史曹元深等郊迎問使者天子起居瓜州南十里鳴沙山云冬夏殷殷有聲如雷云禹貢流沙也又東南十里三危山云三苗之所竄也其西渡都鄉

河曰陽關沙州西曰仲雲族其牙帳居胡盧磧云仲雲者小月支之遺種也其人勇而好戰瓜沙之人皆憚之胡盧磧漢明帝時征匈奴屯田於吾盧蓋其地也地無水而嘗寒多雪每天暖雪銷乃得水匡鄴等西行入仲雲界至大屯城仲雲遣宰相四人都督三十七人候晉使者匡鄴等以詔書慰諭之皆東向拜自仲雲界西始涉礮磧無水掘地得濕沙人置之胸以止渴又復渡陷河伐檉置水中乃渡不然則陷又西至紺州紺州于闐所置也在沙州西南云去京師九千五百里矣又行二日至安軍州遂至于闐聖天

衣冠如中國其殿皆東向曰金冊殿有樓曰七鳳樓以葡萄爲酒又有紫酒青酒不知其所釀而味尤美其食粳沃以蜜粟沃以酪其衣布帛有園圃花木俗喜鬼神而好佛聖天居處嘗以紫衣僧五十人列侍其年號同慶二十九年其國東南曰銀州盧州涓州其南千三百里曰玉州云漢張騫所窮河源出于闐而山多玉者此山也

漢乾祐元年復遣使入貢宋建隆二年十二月聖天遣使貢圭一以玉爲柙使者言國城東有白玉河西有綠玉河次西有烏玉河源出崑崙山去國城西千三百里

每歲秋水小之後國人取玉於河謂之撈玉官取之後方許私取以葡萄醞爲酒味極醇美乾德三年五月于闐僧善名善法來朝賜紫衣其冬又有朝使至四年貢方物開寶二年遣使來貢且言本國有玉一塊凡二百三十七斤願以上進乞遣使取之四年其國王書來言破踈勒國得舞象一欲以爲獻詔俱許之大中祥符二年其國黑韓王遣回鶻羅斯溫等以方物來貢跪上壽上詢其在路幾時去此幾里對曰涉道一年晝行暮息不知里數昔時道路嘗有剽劫今自瓜沙至于闐道道路清謐行旅如流願遣安撫遠俗上曰路遠命使益以勞

費爾國今降詔書汝賫往亦與命使無異也天聖三年遣使來貢玉鞍轡白玉帶胡錦獨峯橐駝乳香硃砂詔給還其直別賜襲衣金帶銀器嘉祐八年八月遣使貢方物十一月以其國王爲特進歸忠保順砮麟黑韓王子闐謂金翅鳥爲砮麟黑韓蓋可汗之訛使言其王乞此號云熙寧以來遠不踰一二歲近則歲再至所貢珠玉珊瑚翡翠象牙乳香木香琥珀花蕊布硃砂龍鹽胡錦玉鞦韆馬膃肭臍金星石水銀安息雞舌香有所持無表章者每賜以暈錦旋襪衣金帶器幣宰相則盤毬雲錦夾襪地產乳香來輒羣負私與商賈牟利不售則

歸諸外府得善價故其來益多元豐初始詔唯賫表及
方物馬驢乃聽詣闕乳香以無用不許貢四年遣蕃部
阿辛上表稱于闐國僂羅有福力知文法黑汗王書與
東方日出處大世界田地主漢家阿舅大官家大畧云
路遠傾心相向前三遣使入貢未回重復數百言董璫
使導至熙州譯其辭以聞詔前三輩使人皆已朝見錫
賚遣發賜勅書諭之神宗嘗問其使去國歲月所經何
國及有無鈔掠對曰去國四年道途居其半歷黃頭回
紇達靺靱青唐唯懼契丹鈔掠耳因使之圖上諸國距漢
境遠近爲書以授李憲八年九月遣使入貢使者爲神
宗飯僧追福賜錢百萬還其所貢獅子元祐中以其使
至無時令熙河間歲一聽至闕八年請討夏國不許紹
聖中其王阿忽都董娥密竭篤又言緬藥家作過別無
報效已遣兵攻甘沙肅三州詔厚答其意知秦州游師
雄言于闐大食拂菻等國貢奉般次踵至有司憚於供
賚扣留邊方限二歲一進夷狄慕義萬里而至此非所
以來遠人也從之自是訖於宣和朝貢不絕

踈勒

踈勒漢時通焉王治踈勒城去長安九千三百里戶千
五百都白山南百餘里東至都尉所二千一百里南有

河西帶葱嶺亦名雪山在國西北百餘里河所出東去

龜茲千五百里西去撥汗國一名千里當大月氏大宛

康居道南去莎車五六百里去朱俱波八九百里隋史云東

北去突厥牙帳千餘里東南去瓜州四千六百里在于闐國北千五百里土多

稻粟蔗銅鐵綿錦雌黃後漢明帝永平中龜茲王建攻

殺踈勒王成自以龜茲左候兜題為踈勒王漢遣班超

劫縛兜題而立成之兄子忠為踈勒王忠後叛反超擊

斬之耿恭為戊己校尉屯車師後王金滿城為匈奴所

攻恭引眾入踈勒城中乏水穿井十五丈不得水恭整

衣冠向井拜拔刀刺山飛泉湧出賊遂退安帝元初中

踈勒王安國死舅臣盤立為王漸以強盛戶至二萬一

千順帝永建二年遣使奉獻至靈帝建寧初為季父和

得所殺自立為王其後連相殺害漢不能復禁至後魏

文成末其王遣使送釋迦牟尼佛袈裟一長二丈餘帝

以其審是佛衣當有靈異命焚之置猛火上終日不燃

其王戴金獅子冠每歲嘗供送於突厥其都城方五里

國內有大城十二小城數十人手足皆六指產子非六

指者即不育勝兵有二千人地多沙磧少壤土俗尚詭

詐生子亦束頭取匾其人文身碧瞳王姓裴氏自號阿

摩支居迦師城突厥以女妻之隋大業中又遣使來唐

貞觀九年獻名馬又四年與朱俱波甘棠貢方物儀鳳
時吐蕃破其國開元十六年遣大理正喬夢松等冊其
君安定爲踈勒王天寶十二載首領裴國良來朝授折
衝都尉賜紫袍魚袋杜環經行記云拔汗那國在怛羅
斯南千里東隔山去踈勒二千餘
里西去本國千餘里城有數十兵有數萬唐天寶十載
嫁和義公主於此國土有波羅林林下有毬場又有野
鼠遍滿山谷偏宜葡萄醜羅果香棗桃李從此國至西
海盡居土室衣羊皮疊布男女皆着靴婦人不飾鉛粉
以青黛塗眼
而已醜音諳

烏孫

烏孫國大昆彌治赤谷城烏孫於西域中其形最異今
之胡人青眼赤鬚狀類彌猴
考本去長安八千九百里戶十二萬口六十三萬勝兵
其種

十八萬八千八百人相大祿左右大將二人侯三人大
將都尉各一人大監二人大吏一人舍中大吏二人騎
君一人東至都護治所千七百二十一里西至康居蕃
內地五千里地莽平多雨寒山多松櫟莽平謂有草莽
而平也櫟木名
其心田作種樹隨畜逐水草與匈奴同俗國多馬富人
至四五千匹民剛惡貪狠無信多寇盜最爲強國故服
屬匈奴後盛大取羈屬不肯往朝會東與匈奴西北與
康居西與大宛南與城郭諸國相接本塞地也大月氏
西破走塞王塞王南越懸度大月氏居其地後烏孫昆
莫擊破大月氏大月氏徙西臣大夏而烏孫昆莫居之

故烏孫民有塞種大月氏種云始張騫言烏孫本與大月氏共在燉煌間今烏孫雖强大可厚賂招令東居故地妻以公主與爲昆弟以制匈奴乃令騫賫金幣往昆莫見騫如單于禮謂自比騫大慙謂曰天子致賜王不拜則還賜謂將賜物還歸漢也昆莫起拜其他如故初昆莫有十餘子中子大祿强善將將衆萬餘騎別居大祿兄太子太子有子曰岑陬子侯反太子蚤死謂昆莫曰必以岑陬爲太子昆莫哀許之大祿怒乃收其昆弟將衆叛謀攻岑陬昆莫與岑陬萬餘騎令別居昆莫亦自有萬餘騎以自備國分爲三大總羈屬昆莫騫旣致賜諭旨曰烏

孫能東居故地則漢遣公主爲夫人結爲昆弟共距匈奴不足破也烏孫遠漢未知其大小又近匈奴服屬日久其大臣皆不欲徙昆莫年老國分不能專制乃發使送騫併獻馬數十匹報謝其使見漢人衆富厚言其國其國後乃益重漢匈奴聞其與漢通怒欲擊之又漢使烏孫乃出其南抵大宛月氏相屬不絕烏孫於是恐使使獻馬願得尚漢公主爲昆弟天子問羣臣議許曰必先納聘然後遣女烏孫以馬千匹聘漢元封中遣江都王建女細君爲公主以妻焉賜乘輿服御物爲備官屬宦官侍御數百人贈送甚盛烏孫昆莫以爲右夫人匈

奴亦遣女妻昆莫昆莫以爲左夫人

其國謂王曰昆公彌亦曰昆莫

主至其國別治宮室而居歲時一再與昆莫會置酒飲食昆莫年老言語不通公主悲愁自作歌以述意天子聞而憐之間歲遣使者贈遺昆莫年老欲使其孫岑陬尚公主公主不聽上書言狀詔從其俗岑陬遂妻公主昆莫死岑陬立岑陬者官號也名軍須靡公主死漢復以楚王戊之孫解憂爲公主妻之岑陬死季父子翁歸靡立號曰肥王復尚解憂公主宣帝初公主及昆彌上言匈奴連歲侵擊欲發國中精兵自給人馬五萬騎盡力擊匈奴唯天子出兵以救本始三年漢發十五萬騎

五將軍分道並出遣校尉常惠持節護烏孫兵昆彌將五萬騎從西方入至匈奴右谷蠡王庭獲四萬級馬牛羊騾橐駝七十餘萬元康二年昆彌上書願以漢外孫

元貴靡爲嗣

解憂主子

得令復尚公主詔下公卿議蕭望之

等以爲烏孫絕域變故難保不可許上美烏孫新立大功難重絕故業許其婚會翁歸靡死國人共立岑陬子泥靡代爲昆彌元貴靡不得立乃不復與婚泥靡旣立號狂王復尚解憂生一男鴟靡王不與主和又暴惡失衆漢使衛司馬魏和意副候任昌送侍子公主言狂王爲烏孫所患苦易誅也遂謀置酒會罷使士拔劍旁下

狂王傷上馬馳去其子細沈瘦會兵圍和意昌及公主於赤谷城數月城中困急都護鄭吉發諸國兵救之乃解去初肥王翁歸靡胡婦子烏就屠狂王傷時驚與諸翮音翁侯俱去居北山中揚言母家匈奴兵來故眾歸之後遂襲殺王自為昆彌宣帝詔立肥王之子元貴靡為大昆彌烏就屠為小昆彌元貴靡後孫雌栗靡立國亂段會宗立其季父伊秩靡為大昆彌哀帝元壽二年伊秩靡與匈奴單于烏珠留名橐如牙斯呼韓邪之子並入朝漢以為榮自烏孫分立兩昆彌後漢用憂勞且無寧歲言或鎮撫之或威制之其後無聞至後魏時亦朝貢其國數為蠕蠕所侵多事

西徙葱嶺

姑墨

姑墨漢時通焉王治南城去長安八千一百里戶三千五百東至都護治所二千里南至于闐馬行十五日北界接烏孫出銅鐵雌黃東通龜茲六百里王莽時其王丞殺溫宿王并其國至後魏時役屬龜茲

溫宿

溫宿漢時通焉王治溫宿城今京兆府醴泉縣北有山名溫宿嶺者本因漢時溫

宿國人令居此因以名山去長安八千三百餘里戶二千二百東至

都護治所二千三百餘里西至尉頭三百里北至烏孫

赤谷六百餘里土地物類所有與鄯善諸國同通姑墨東二百餘里至後魏時亦役屬龜茲

烏耗

烏耗

上一加反下直加反

漢時通焉王治烏耗城去長安萬里戶

五百東北至都護治所四千九百北與子合蒲犁西與

難兜接山居田石間有白草累石為室人接手

自高山下溪澗

中飲水故接連其手如猿飲

出小步馬

小細也細步言其能蹠足所謂百步千足

有驢無

牛西有懸度

山石溪谷不通以獨索相引而度

去陽關五千九百里去

都護治所五千里其國後魏又通謂之於摩國

西戎難兜

難兜漢時通焉去長安萬一百里戶五千東北至都護治所二千八百里西南至罽賓三百里南至婁羌北與休屠西與大月支接種五穀葡萄果有銀鐵銅作兵與諸國同屬罽賓

大宛

大宛漢時通焉王治貴王山城去長安萬二千五百里戶萬東至都護治所四千里北至康居于闐城千五百里西南至大月氏七百里北與康居南與大月氏接土地風氣物類人俗與大月氏安息同大宛左右以葡萄為酒富人藏酒至萬餘石久者至數十年不敗人嗜酒

馬嗜苜蓿多善馬汗血言其先天馬子

大宛國中有高山其上有馬不

可得因取五色母馬置其下與集生駒其汗血因號為天馬子始張騫為武帝言之帝

遣使者持千金及金馬以請宛善馬宛王以漢絕遠大

兵不能至遂殺漢使太初元年拜李廣利為貳師將軍

期至貳師取善馬率數萬人至其境攻郁城不下引還

往來二歲至燉煌士卒存者十不過一二帝怒其不剋

使遮玉門不許入貳師因留屯燉煌又遣貳師率六萬

人負私從者不與焉牛十萬馬三萬匹驢橐駝萬數天

下騷然益發戍甲卒十八萬置居延休屠

今武威張掖郡界以

衛酒泉貳師至宛宛人斬王母寡首獻馬漢軍取其善

馬數十匹中馬以下牝牡三千匹而立宛貴人昧蔡為

王約歲獻馬遂採葡萄苜蓿種而歸貳師再行往返凡

四歲自宛以西至安息雖頗異言然大同自相曉知也

其人皆深目多髭髯善賈其俗貴女子女子所言丈夫

乃決正其地無絲漆不知鑄器及漢使亡卒降教鑄作

兵器後漢明帝時宛又獻汗血馬至後魏文成帝和平

六年孝文太和三年並遣使獻馬隋時蘇對沙那國即

漢大宛也

宋膺異物志大宛馬有肉角數寸或有解人語及知音舞與鼓節相應者隋西域圖記云

其馬騮馬烏馬多赤耳黃馬赤馬多黑耳唯耳色別自餘毛色與常馬不異又云王姓蘇色匿字底失槃陀積

代承襲不絕按今王即底失槃陀之後也

莎車

莎車國治莎車城去長安九千九百五十里戶二千三百三十九口萬六千三百七十三勝兵三千四十九人輔國侯左右將左右騎君備西夜君各一人都尉二人譯長四人東北至都護治所四千七百四十六里西至踈勒五百六十里西南至蒲犁七百四十里有鐵山出青玉漢宣帝時烏孫公主小子萬年莎車王愛之莎車王無子死死時萬年在漢莎車國人計欲自託於漢又欲得烏孫心卽上書請萬年爲莎車王漢許之遣使者奚充國送萬年萬年初立暴惡國人不說莎車王弟呼

屠徵殺萬年并殺漢使者自立爲王約諸國背漢會衛候馮奉世使送大宛客卽以便宜發諸國兵擊殺之更立他昆弟子爲莎車王諸國悉平威振西域奉世至大宛大宛聞其斬莎車王敬之異於他使得名馬象龍而還馬形似龍帝甚說下議封奉世少府蕭望之以奉世壇發

諸國兵雖有功不可爲後法後奉使者爭發兵要功萬里外爲國生事於夷狄不可長不宜受封帝善其議拜奉世光祿大夫匈奴單于因王莽之亂畧有西域唯莎車王延最强不肯附屬元帝時嘗爲侍子長於京師慕樂中國亦復參其典法常勅諸子當世奉漢家不可負

也天鳳五年延死諡忠武王子康代立光武初康率傍國拒匈奴擁衛故都護吏士妻子千餘口檄書河西問中國動靜自陳思慕漢家建武五年河西大將軍竇融乃承制立康爲漢莎車建功懷德王西域大都尉五十國皆屬焉九年康死諡宣成王弟賢代立攻破拘彌西掖國皆殺其王而立其兄康兩子爲拘彌西掖王十四年賢與鄯善王安並遣使詣闕貢獻於是西域始通葱嶺以東諸國皆屬賢十七年賢復遣使奉獻請都護天子以問大司空竇融以爲賢父子兄弟相約事漢欵誠又至宜加號位以鎮安之帝乃因其使賜賢西域都

護印綬及車旗黃金錦繡燉煌太守裴遵上言夷狄不可假以大權又令諸國失望詔書收還都護印綬更賜賢以漢大將軍印綬其使不肯易遵迫奪之賢由是始恨而猶詐稱大都護移書諸國諸國悉服屬焉號賢爲單于賢浸以驕橫重求賦稅數攻龜茲諸國諸國恐懼二十一年冬車師前王鄯善焉耆等十八國俱遣子入侍獻其珍寶及得見皆流涕稽首願得都護天子以中國初定北邊未服皆還其侍子厚賞賜之是時賢自負兵強欲并兼西域攻擊益甚諸國聞都護不出而侍子皆還大憂恐乃與燉煌太守檄願留侍子以示莎車言

侍子見留都護尋出冀且息其兵裴遵以狀聞天子許之二十二年賢知都護不至遂遣鄯善王安書令絕通漢道安不納而殺其使賢大怒發兵攻鄯善安迎戰兵敗亡入山中賢殺掠千餘人而去其冬賢復攻殺龜茲王遂兼其國鄯善焉者諸國侍子久留燉煌愁思皆亡歸鄯善王上書願復遣子入侍更請都護都護不出誠迫於匈奴天子報曰今使者大兵未能得出如諸國力不從心東西南北自在也於是鄯善車師復附匈奴而賢益橫媯塞王自以國遠遂殺賢使者賢擊滅之立其國貴人駟鞬爲媯塞王賢又自立其子則羅爲龜茲王

賢以則羅年少乃分龜茲爲烏壘國徙駟鞬爲烏壘王又更以貴人爲媯塞王數歲龜茲國人共殺其王則羅駟鞬而遣使匈奴更請立王匈奴立龜茲貴人身毒爲龜茲王龜茲由是屬匈奴矣賢以大宛貢稅減少自將諸國兵數萬人攻大宛大宛王延留迎降賢因將其還國徙拘彌王橋塞提爲大宛王而康居數攻之橋塞提在國歲餘亡歸賢復以爲拘彌王而遣延留還大宛使貢獻如常賢又徙于闐王俞林爲驪歸王立其弟位侍爲于闐王歲餘賢疑諸國欲叛召位侍及拘彌姑墨子合王盡殺之不復置王但遣將鎮守其國莎車將在于

闐者暴虐爲其國人所殺賢乃引兵攻于闐兵敗而走于闐大人休莫霸進圍莎車中流矢死兵乃退于闐立休莫霸兒子廣德爲王匈奴與龜茲諸國共攻莎車不能下賢連被兵革乃與廣德和後廣德虜賢妻子而并其國匈奴遣兵將賢質子不居微立爲莎車王廣德又攻殺之更立其弟齊黎爲王章帝元和三年長史班超發諸國兵擊莎車大破之由是遂降漢矣

班固論曰孝武之世圖制匈奴患其兼從西國結黨南羌乃表河西列四郡開玉門通西域以斷匈奴右臂隔絕南羌月支單于失援自是遠遁而幕南無王

庭因文景元默養人五代天下殷富財力有餘士馬強盛故能睹犀象璫瑁則建珠崖七郡感蒟醬竹杖則開牂牁越雋聞天馬葡萄則通大宛安息自是之後萬里相奉師旅之費不可勝計至於用度不足乃權酒酤筦鹽鐵鑄白金造皮幣算至車船租及六畜人力屈財貨竭因之以凶年羣盜並起是以末年遂棄輪臺之地且下哀痛之詔豈非仁聖之所悔哉且通西域近有龍堆遠則葱嶺身熱頭痛懸度之阨淮南杜欽揚雄之論皆以爲此天地所以界別區域絕外內也書云西戎卽序禹就而序之非上威服致其

貢物也西域諸國各有君長兵衆分弱無所統一雖屬匈奴不相親附匈奴能得其馬畜旃罽而不能統率與之進退與漢隔絕道路又遠得之不爲益棄之不爲損盛德在我無取於彼自建武以來西域思漢盛德咸樂內屬唯其小邑鄯善車師界迫匈奴尚爲所拘而其大國莎車于闐之屬數遣使請都護置質聖上遠覽古今因時之宜羈縻不絕辭而未許雖大禹之序西戎周公之讓白雉太宗之却走馬義兼之矣亦何以尚茲

罽賓

罽賓國治循鮮城去長安萬二千二百里不屬都護戶口勝兵多大國也東北至都護治所六千八百四十里東至烏秣國二千二百五十里東北至難兜國九日行西北與大月氏西南與烏弋山離接昔匈奴破大月氏大月氏西君大夏而塞王南君罽賓塞種分散往往爲數國自踈勒以西北休循捐毒之屬皆故塞種也罽賓地平溫和有苜蓿雜草奇木檀榲卽槐之類梓竹漆種五穀葡萄諸果糞治園田地下濕生稻冬食生菜其民巧雕文刻鏤治宮室織罽刺文繡好治食有金銀銅鐵以爲器市列市有列肆亦如中國也以金銀爲錢文爲騎馬幕爲

人面錢文面作騎馬形幕面作人面出犂牛水牛象大狗

沐猴孔爵犂牛項上隆起者也罽賓大狗大如驢珠璣

珊瑚琥珀璧琉璃孟康曰琉璃青色如玉師古曰魏畧云大秦國出赤白黑黃青綠縹緋紅

紫十種琉璃此蓋自然之物采澤光潤異於眾玉其色不恒今俗所謂皆銷治石汁加以眾藥灌而為之尤虛

脆不真實非其物也他畜與諸國同自漢武帝始通罽賓自以絕

遠漢兵不能至其王烏頭勞數剽漢使烏頭勞死子代

立遣使奉獻漢使關都尉文忠送其使王復欲害忠忠

覺之乃與容屈王子陰末赴共合謀攻罽賓殺其王立

陰末赴為罽賓王授印綬後軍候趙德使罽賓與陰末

赴相失相失意也陰末赴鎖琅當德琅當長鎖也若今之禁繫人鎖殺副以

下七十餘人遣使者上書謝孝元帝以絕域不錄放其

使者於懸度絕而不通成帝時復遣使獻謝罪漢欲遣

使者報送其使杜欽說大將王鳳曰前罽賓王陰末赴

本漢所立後卒畔逆夫德莫大於有國罪莫大於執殺

使者所以不報恩不懼誅者自知絕遠兵不至也有求

則卑辭無欲則驕慢終不可懷服凡中國所為通厚蠻

夷愜快其欲者為壤比而為寇今懸度之阨非罽賓所

能越也其向慕不足以定西域雖不附不能危城郭城郭

總謂西域諸國前親逆節惡暴西域故絕而不通今悔過來而

無親屬貴人奉獻者皆行賈賤人欲通貨市買以獻為

名故煩使者送至懸度恐失實見欺凡遣使送客者欲
爲防護寇害也起皮山南更不屬漢之國四五斤候士
百餘人五分夜擊刁斗自守夜有五更故分而持之也尚時爲所侵
盜驢畜負糧須諸國廩食得以自贍國或貧小不能食
或桀黠不肯給擁強漢之節餒山谷之間乞丐無所得
離一二旬則人畜棄捐曠野而不反又歷大頭痛小頭
痛之山赤土身熱之阪令人身熱無色頭痛嘔吐驢畜
盡然又有三池盤石阪道隘者尺六七寸長者徑三十
里臨崢嶸不測之深行者騎步相持繩索相引二千餘
里乃到懸度畜墜未平阬谷盡靡碎人墮勢不得相收

視險阻危害不可勝言聖王分九州制五服務盛內不
求外今遣使者承至尊之命送蠻夷之賈勞吏士之衆
涉危難之路罷敝所恃以事無用非久長之計也使者
業已受節可至皮山而還言已立計遣之不能即止可至皮山也於是鳳

白從欽言罽賓實利賞賜賈市其後數年而一至云自
後無聞至後魏始通之都善見城隋時謂之漕國在葱

嶺之西南

隋史曰卽漢罽賓國

其王姓昭武康國之宗族勝兵萬

餘人國法嚴整殺人及賊盜皆死其俗淫祀葱嶺山有
順天神者儀制極華金銀爲屋以銀爲地祠前一魚脊
骨其孔中通馬騎出入國王戴金牛頭冠坐金馬座土

多稻粟豆麥有硃砂青黛安息青木等香石蜜黑鹽阿
魏沒藥白附子北去帆延七百里東去劫國六百里南
去瓜州六千六百里大業中遣使貢物唐武德二年遣
使貢寶帶金鎖水精酸玻璃狀若酸棗貞觀中獻名馬
遣使厚齎賜其國并撫慰天竺處羅拔王再拜受命遣
使導至天竺十六年又入貢國人共傳王始祖曰馨孽
至曷頽支傳十二世顯慶三年以其地爲修鮮都督府
神龍初拜其王修鮮等十一州諸軍事修鮮都督開元
七年遣使獻天文及秘文奇藥其王請以子拂林罽婆
嗣聽之天寶四載冊其子勃訶準襲王乾元初使者入

貢

吐呼羅

吐呼羅去代一萬二千里東至范陽國西至悉萬斤國
中間相去二千里南至連山不知名北至波斯國中間
相去一萬里薄提城周匝六十里城南有大水西流名
漢樓河土宜五穀有好馬馳騾其王曾遣使入貢

拔豆

拔豆國去代五萬一千里東至多勿當國西至旃那國
中間相去七百五十里南至罽陵伽國北至伏那伏且
國中間相去九百里國中出金銀雜寶白象水牛犛牛

葡萄五穀

謝颺 帆延 石汗那

謝颺居吐火羅西南本曰漕矩吒唐顯慶時謂訶達羅支武后改今號東距罽賓東北帆延皆四百里南婆羅門西波斯北護時健其王居鶴悉那城七千里多鬱金瞿草糞泉灌田國中有突厥罽賓吐火羅種人雜居罽賓取其子弟持兵以禦大食景雲初遣使朝貢後遂臣罽賓開元八年天子冊葛達羅支頡利發誓屈爾為王至天寶中數來朝獻帆延者或曰望衍曰梵衍那居斯卑莫運山之旁西北與護時健接東南距罽賓西南訶

達羅支與吐火羅連境地寒人穴居王治羅爛城有大城四五水北流入烏訥河貞觀初遣使者入朝顯慶三年以羅爛城為寫鳳都督府縛時城為悉萬州授王荀寫鳳州都督管內五州諸軍事自是朝貢不絕也石汗那或曰斫汗那自縛野底南入雪山行四百里得帆延東臨烏訥河多赤豹開元天寶中一再朝獻

識匿 似沒 役槃 俱蜜 護蜜附

識匿或曰屍棄尼曰瑟匿東南直京師九千里東五百里距葱嶺守捉所南三百里屬護蜜西北五百里抵俱蜜初治苦汗城後散居山谷有大谷五酋長自為治謂

之五識匿地二千里無五穀人喜攻剽劫商賈播蜜川
四谷稍不用王號令俗窟室唐貞觀二十年與似沒役
槃二國使者偕來朝開元十二年授王布遮波資金吾
衛大將軍天寶六載王跌失伽延從討勃律戰死擢其
子都督左武衛將軍給祿居蕃似沒者北接石土俗與
康同役槃亦與康鄰出良馬俱蜜者治山中在吐火羅
東北南臨黑河其王突厥延陀種貞觀十六年遣使者
入朝開元中獻胡旋舞女其王那羅延頗言爲大食暴
賦天子但慰遣而已天寶時王伊悉爛俟斤又獻馬護
蜜者或曰達摩悉鐵帝曰鑊俚元魏所謂鉢和者亦吐

火羅故地東南直京師九千里而羸橫千六百里王居
塞迦審城北臨烏澣河地寒沍堆阜曲折沙石流漫有
豆麥宜木果出善馬人碧瞳顯慶時以其地爲烏飛州
王沙鉢羅頡利發爲刺史地當四鎮入吐火羅道故役
屬吐蕃開元八年冊其王羅旅伊陀骨咄祿多毗勒莫
賀達摩薩爾爲王十六年與米首領米忽汗同獻方物
明年大酋烏鶻達于復朝王死冊其從弟護真檀嗣王
二十六年身入朝宴內殿拜左金吾衛將軍賜紫袍金
帶天寶初請絕吐蕃賜鐵券八載真檀來朝請宿衛詔
授右武衛將軍久乃遣又遣首領朝貢乾元元年王紇

設伊俱鼻施來朝賜氏李

帶天鳥弋山離

鳥弋山離漢時通焉去長安萬二千二百里不屬都護

戶口多大國也東北至都護治所六十日行東與罽賓

北與撲桃西與犁靬條支犁靬即大秦也犁與驪同靬巨連反行可百餘

日乃到條支魏時其國名排持

條支漢時通焉去陽關三萬二千一百里在葱嶺之西

城在山之上周圍四十餘里臨西海水曲環其南及東

北三面路絕唯西北隅通陸道土地暑濕田宜稻出犂

牛孔雀有大鳥卵如甕人眾甚多往往有小君長安息

役屬之以為外國安息以條支為外國如言蕃國善眩其草木畜產五

穀果菜食飲宮室布列錢貨兵器金珠之屬皆與罽賓

同而有桃拔獅子犀牛桃拔一名符拔似鹿長毛一角者或為天鹿兩角者或為辟拔

獅子似大蟲正黃有頰形尾端茸毛大如斗爾雅亦謂之狻猊拔音步葛反形亦頰旁毛也頰音而占反形音

而其錢獨文為人幕為騎馬絕遠漢使希至自玉門陽

關出南道歷鄯善而南行鳥弋山南道極矣轉北而東

馬行六十餘日至安息後漢和帝永元中班超遣掾甘

英使大秦抵條支臨大海欲渡而安息西界船人謂英

曰海水廣大往來者逢善風三月乃得渡若遇惡風雨

乾隆十二年校刊

四裔十四

三

亦有三歲者故入海人皆賞三歲糧海中善使人思土

戀慕數有死亡者英乃止安息長老傳聞條支有弱水

西王母亦未嘗見也元中記云崑崙之弱水鴻毛不能起也爾雅云觚竹北戶西王母日

下謂之四荒也自條支乘水西行百餘日近日所入云

安息

安息漢時通焉王治蕃兜城蕃音盤去長安萬一千六百

里在葱嶺之西大宛之西可數千里不屬都護北與康

居東與鳥弋山離西與條支接土地風氣物類人俗與

鳥弋屬賓同亦以銀為錢文獨為主面幕為夫人面王

死輒更鑄錢有大馬大爵大爵頸長鷹身蹄似橐駝色蒼舉頭高八九尺張翅丈餘

食大地方數千里最大諸國地臨媯水今謂鳥商賈車

船行旁國畫革旁行為書記今西方胡書皆橫行不直下革謂皮不柔者武

帝始遣使至安息其王令騎迎於東界木鹿城號為小

安息去王都數千里行北過數十城人戶相屬因發使

隨漢使以大鳥卵及犁靛眩人獻至後漢章帝時治和

犢城遣使獻獅子符拔符拔形似麟而無角自安息西

行三千四百里至阿蠻國從阿蠻西行三千六百里至

罽賓國從罽賓南行渡河又西至于羅國九百六十里

安息西界極矣自此南乘海乃通大秦其土多海西珍

奇異物至後周武帝天和二年其王治蔚搜城遣使貢

獻至隋大業五年安息國遣使朝貢王姓昭武與康國
王同族都在那蜜水南城有五重環流水宮殿皆為平
頭王坐金駝座高七尺風俗同於康國唯妻其姊妹及
母子遞相禽獸此為異也

文獻通考卷第三百三十七

文獻通考卷第三百三十八

鄯陽馬端臨貴與著

四裔考十五

大夏

大夏漢時通焉在大宛西南二千餘里媯水南其俗土
著有城屋與大宛同俗去漢萬二千里居漢西南本無
大君長城邑往往置小君長其兵弱畏戰善賈市及大
月氏西徙乃攻之皆臣畜共稟漢使者同受節度大夏人多
可萬餘有市販賈諸物其東南界接身毒國皆屬大月
氏

大月氏

大月氏漢時通焉治藍氏城在大宛西可二三千居
居六千五百里土地氣候物類風俗錢貨與安息同出
去長安萬一千六百里不屬都護戶十萬東去長史所
封駝脊上高起其國本行國也隨畜移徙與匈奴同俗控弦
十餘萬故恃強輕匈奴本居燉煌祁連間祁連在今張掖郡之西北
至冒頓單于攻月氏而老上單于殺月氏王以其頭為
飲器乃遠去過大宛西擊大夏而臣之都媯水北為王
庭其餘小眾不能去者保南山羗號小月氏於大夏分

其國為五部翎

翎音翁

侯武帝聞月氏遁而怨匈奴無與

共擊之方從事滅胡乃使張騫使月氏時月氏既君大

夏地肥饒少寇志安樂又自以遠漢殊無報胡之心騫

從月氏至大夏竟不能得月氏要領而還後百餘歲貴

霜翎侯兵就却攻滅四翎侯自立為王因號貴霜王又

滅僕達闐賓悉有其國復滅天竺月氏自此之後最為

富盛至後魏代北與蠕蠕接數為所侵遂西徙都薄羅

城去弗敵沙二千一百里

弗敵沙在藍氏城東

後其王寄多羅勇

武遂與師越大山南侵北天竺自乾陀羅以北五國盡

役屬之國人乘四輪車或四牛六牛八牛輓之在車大

小而已太武時其國人商販到京師自云能鑄石爲五色琉璃於是採礦山中於京師鑄之既成光澤美於西方來者乃詔爲行殿容百餘人光色映徹觀者驚以爲神明所作自此琉璃遂賤人不復珍之元中記瑪瑙出名爲日及今日取其肉明日創愈朱鷹異物志云大月氏又有牛月氏國有羊尾重者十斤割之供養尋生如故

小月氏

小月氏治富樓沙城其王本大月氏王寄多羅子也寄多羅爲蠕蠕所逐西徙後令其子守此城因號小月氏焉在波路西南後魏史云去漢萬六千六百里先居西平張掖之間並今郡被服頗與羌同其俗以金銀錢爲貨隨畜牧移徙亦

類北狄其城東十里有佛塔周三百五十步高八十丈自佛塔初建計至武定八年八百四十二年所謂百丈浮圖也晉天福時有仲雲旋居胡盧磧卽其遺種詳見于闐考

康居 安者東安附

康居漢時通焉在大宛西北可二千里與粟弋伊隣接王治樂越匿地卑闐城亦居蘇薤城去長安萬二千三百里不屬都護戶十二萬東至都護治所五千五百里與大月氏同俗地和暖饒桐柳葡萄多牛羊出好馬東羈事匈奴宣帝時郅支單于殺漢使者西阻康居依其險阻

以自保固其後甘延壽陳湯誅滅郅支單于至成帝時康居遣子侍漢貢獻然自以絕遠獨驕慢都護郭舜數上言康居驕黠今遣子入侍此其欲賈市為好辭之詐也宜歸其侍子絕勿復使不通使於其國燉煌酒泉二郡及南道八國給使者往來人馬騾橐駝食皆苦乏空罷耗所過送迎驕黠絕遠之國非至計也漢為其新通重致遠人此以聲名為重終羈縻而未絕自後無聞或名號變易或遷徙吞併非所詳也晉武帝泰始中其王那鼻遣使獻善馬後魏太武太延中遣使朝貢其國又稱者舌後魏史云即漢康居國隋時謂之康國大業中遣使朝其王姓温月氏人也隋史

云即漢康居之後自漢以來相承不絕舊居祁連山昭武城自被匈奴所破西域葱嶺遂有此國枝庶各分王故康國左右諸國米國史國曹國何國安國小安國那色波國烏那曷國穆國凡九國皆其種類並以昭武為姓示不忘本也康國都於薩寶水上阿祿迪城王索髮冠七寶金花衣綾羅錦繡白疊其妻有髻幪以帛巾丈夫剪髮錦袍名為強國西域諸國多歸之人皆深目高鼻多鬚髯善商賈諸夷交易多轉其國有大小鼓琵琶五弦箜篌笛婚姻喪制與突厥同俗奉佛為胡書氣候温宜五穀勤修園蔬樹木滋茂出馬駝騾犂牛黃金礪砂甘松香阿薩那

香枇杷麋皮氍毹錦疊多葡萄酒富家或至千石連年
不敗韋節西蕃記云康國人並善賈男年五歲則令與
書少解則遣學賈以得利多爲善其人好音聲以六月
一日爲歲首至此日王及人庶並服新衣剪髮鬚在國
城東林下七日馬射至欲罷日置一金錢於帖上射中
者則得一日爲王俗事天神崇敬甚重云神兒七月死
失骸骨事神之人每至其月俱著黑疊衣徒跣撫膺號
哭涕淚交流丈夫婦女三五百人散在草野求天兒骸
骨七日便止國城外別有二百餘戶專知喪事別築一
院院內養狗每有人死卽往取屍置此院內令狗食之

肉盡收骸骨埋殯無棺槨其國大城三十小堡三百尚
浮屠法祠妖神出機巧技十一月鼓舞乞寒以水交潑
爲樂唐武德十年遣使來獻貞觀五年又獻獅子獸金

桃銀桃

杜環經行記康國在米國西南三百餘里土沃人富

高宗永徽時以其地

爲康居都督府卽授其王爲都督開元初貢鎖子鎧水
精杯碼碯瓶駝鳥卵其子與大食亟戰不勝來乞師天
子不許久之封其子咄曷爲曹王默啜爲米王安者一
曰布豁又曰捕喝元魏謂忸密者東北至東安西南至
畢皆百里所西瀕烏澹河治阿濫密城卽康居小君長
屬王故地大城四十小堡千餘募勇健者爲柘羯柘羯

猶中國言戰士也武德時遣使入朝貞觀初獻方物太宗厚慰其使曰西突厥已降商旅可行矣諸胡大說其王訶陵迦又獻名馬自言一姓相承二十二世云是歲東安國亦入獻言丁姓相承十世云東安或曰小國曰喝汗在那密水之陽東距河二百里許西南至大安四百里治喝汗城亦曰篋斤大城二十小堡百顯慶時以阿監爲安息州卽以其王昭武殺爲刺史篋斤爲木鹿州以其王昭武閉息爲刺史開元十四年其王遣使朝納馬豹後八年獻波斯驪二拂菻繡毬一鬱金香石蜜等其妻可敦獻柘辟大毬毬二繡毬一玉賜袍帶鎧

仗及可敦袿襦裝澤

鋤汗

鋤汗國居葱嶺之西五百餘里古渠搜國也元魏時謂拔汗那或曰破落那有大城六小城百人多壽王姓昭武字阿利柴都城方四里勝兵數千人王坐金羊床妻戴金花俗多朱砂金鐵東去疎勒千里西至蘇對沙那國五百里西北去石國五百里東北去突厥可汗牙二千餘里東去瓜州五千五百里其王自魏晉相承不絕隋大業中遣使貢方物唐貞觀初王契苾爲西突厥所殺子遏波之治渴塞城顯慶初遏波之遣使朝貢高宗

厚慰諭三年以渴塞城爲休循州都督就授刺史自是歲朝貢元宗開元二十七年其王以功拜奉化王天寶三載改其國號寧遠帝以外家姓賜其王曰竇又封宗室女爲公主降之十三年王忠節遣子薛裕朝請留宿衛習華禮聽之授左武衛將軍其事唐最謹

米國

米國都那密水西舊康居之地無王其城主姓昭武康國王之支庶字閉拙都城方二里勝兵數百人西北去蘇對沙那國五百里西南去史國二百里東去瓜州六千四百里隋大業中頻貢方物

鳥那邊國

鳥那邊國都鳥澣水西舊安息之地王姓昭武亦康國王種類字佛食都城方二里勝兵數百人東北至安國四百里西北至穆國二百餘里東去瓜州七千五百里隋大業中遣使貢方物

穆國

穆國都鳥澣河之西亦安息之故地與鳥那邊爲隣王姓昭武氏亦康居王種類字阿濫密都城方三里勝兵二千人東北去安國五百里東去鳥那邊二百餘里西去波斯國四千餘里東去瓜州七百里隋大業中遣使

貢方物

曹國

東曹西曹中曹附

曹國隋時聞焉都那密水南數里舊是康居之地國無主康居王令子烏建領之勝兵千餘人國中有得悉神自西海以東諸國並敬事之其神有金人破羅闊丈五尺高下相稱每月以駝五頭馬十匹羊百口祭之常有數千人食之不盡東南去康國百里西去何國百五十里東去瓜州六千六百里大業中遣入貢東曹或曰都率沙那蘇對沙那劫布咀那蘇都識匿凡四名居波悉山之陰漢貳師城地也東北距俱戰提二百里北至石

西至康東至寧遠皆四百里許南至吐火羅五百里有野义城城有巨窟巖以關鑰歲再祭人向窟立中卽煙出先觸者死武德中與康同遣使入朝其使曰本國以臣爲健兒聞秦王神武欲隸麾下高祖大悅西曹者隋時曹也南接使及波覽治瑟底痕城東北越于底城有得悉神祠國人事之有金貝器欸其左曰漢時天子所賜武德中入朝天寶元年王哥邏僕羅遣使者獻方物詔封懷德王卽上言祖考以來奉天可汗願同唐人受調發佐天子征討十一載東曹王設忽阿與安王請擊黑衣大食元宗慰諭之不聽中曹者居西曹東康之北

王治迦底真城其人長大工戰鬪

何國

何國都那密水南數里亦舊康居地王姓昭武康居之

族類國城樓北壁畫華夏天子西壁畫拂菻力甚諸國

東壁則畫突厥婆羅門諸國王勝兵千人風俗與康國

同東去曹國百五十里西去小安國三百里東去瓜州

六千七百五十里隋大業中遣使入貢唐貞觀十五年

遣使入朝永徽時上言聞唐出師西討願輸糧於軍俄

以其地為貴霜州授其王刺史

西至史國至

史國都獨莫水南十里亦舊康居之地其王姓昭武亦

康國王之後枝庶勝兵千餘人俗同康國北去康國二

百三十里南去吐火羅五百里西去那色波國二百里

東北去米國二百里去瓜州六千里隋大業中遣使貢

方物後漸強盛乃創建乞史城為數十里郭邑二萬家

有鐵門山左右峭巉石色如鐵為關以限二國以金固

闔城有神祠每祭必千羊唐貞觀十六年復入貢顯慶

時以其地為陸沙州授其君刺史開元十五年來獻舞

女其後首領時時入朝天寶中詔改史為來威國

奄蔡

乾隆十二年校刊

四裔十五

奄蔡漢時通焉西與大秦接東南二千里與康居接去
陽關八千餘里控弦十餘萬與康居同俗而屬康居士
氣溫和臨大澤無涯岸多植松白草及豹畜牧逐水草
蓋近北海至後漢改名阿蘭那國後魏時曰粟特一日
温那沙後漢史云初匈奴殺其王而有其國至文
成帝初遣使朝貢其王忽俛已三世矣其國
商人先多詣涼土販易及魏克姑臧悉見虜文成初粟
特王遣人贖之自後無使貢獻周保定四年來貢方物
滑國阿跋檀周古柯胡密丹附國二百里
滑國車師之別種也後漢順帝永建初八滑從班勇擊
北虜有功漢以八滑爲後部親漢侯自魏晉以來不通

中國至梁武帝普通初其王厭帶夷粟陀始遣使獻貢
黃獅子白貂裘波斯錦等物後魏之居桑乾也滑猶小
國屬蠕蠕後稍强大征其旁國波斯渴槃罽賓龜茲疎
勒姑墨于闐等國焉其獸有獅子兩脚駝野驢有角人
皆善騎射著小袖長袍用金玉爲帶女人披裘頭上刻
木爲角長六寸以金銀飾之兄弟共妻無城羶屋爲居
東向開戶其王坐金牀隨太歲轉無文字以木爲契與
旁國通使國中爲胡書羊皮爲紙無職官事天神火神
每日則出戶祀神而後食跪一拜而止死以木爲槨父
母死其子截一耳葬訖卽吉其言語待譯而後通至後

魏時謂之滑匪阿跋檀周古柯胡密丹等國並滑旁小國也衣服容貌皆同普通初使使隨滑入貢

白題

白題王姓支名史稽殺其先蓋匈奴之別種胡漢灌嬰與匈奴戰斬白題騎一人是也在滑國東去滑六日行西極波斯土地出粟麥瓜果食物略與滑同梁普通三年遣使貢方物

嚙嚙

嚙嚙國大月氏之種類也亦曰高車之別種其原出於塞北自金山至後魏文成帝時已七八十年矣在于闐

之西去長安一萬一百里其王都拔底延城蓋王舍城也其城方十餘里多寺塔皆飾以金風俗與突厥略同其俗兄弟共一妻夫無兄弟者妻戴一角帽若有兄弟者依其多少之數更加帽角焉衣服類加以纓絡頭剪髮其語與蠕蠕高車及諸胡不同衆可有十萬無城邑依隨水草以氊爲屋夏遷涼土冬逐暖處其諸妻皆在別所相去或一二百里三百里其王巡歷而行每月一處冬寒之時三月不徙王位不必傳子子弟堪者死便受之其國無車有輿多駝馬用刑嚴急賊盜無多少皆腰斬一責十死者富家累石爲藏貧者掘地而埋隨身

諸物皆置塚內其人凶悍能鬪戰西域康居于闐沙勒
安息及諸小國三十許皆役屬之號爲大國與蠕蠕婚
姻自後魏太安之後每遣使朝貢正光末貢獅子一至
高平遇萬俟醜奴反因留之醜奴平送京師永熙以後
朝獻遂絕初熙平中明帝遣賸仗子統宋雲沙門法力
等使西域訪求佛經時有沙門慧生者亦與俱行正光
中還慧生所經諸國不能知其本末及山川里數蓋舉
其略云至大統十二年遣使貢方物廢帝二年周明帝
二年並遣使來獻爲突厥所破部落分散職貢遂絕隋
大業中又遣使朝貢方物其國去曹國于五百里東至

瓜州六千五百里

鉢和

鉢和在渴槃陀西其土尤寒人畜同居穴地而處又有
大雪山望若銀峰其人唯食餅麪飲麥酒服氊裘有二
道一道西行向嚙噠一道西南趨烏萇亦爲嚙噠所統

波知

波知國在鉢和西南土狹人貧依託山谷其王不能總
攝有三池傳云大池有龍王次者有龍婦小者有龍子
行人經之設祭乃得過不祭多遇風雪之困

賒彌

賒彌國在波知之南山居不信佛法專事諸神亦附噉
噠東有鉢盧勒國路嶮緣鐵鎖而度下不見底後魏熙
平中遣使宋雲等竟不能達

烏萇

烏萇國在賒彌南北有葱嶺南至天竺婆羅門胡爲其
上族婆羅門多解天文吉凶之數其主動則訪決焉土
多林果引水灌田豐稻麥事佛多諸寺塔極華麗人有
爭訟服之以藥曲者發狂直者無恙爲法不殺犯死罪
唯徙於靈山西南有檀特山山上立寺以驢數頭運食
山下無人控御自知往來也

乾陀

乾陀國在烏萇西本名業波爲噉噠所破因改焉其王
本是敕勒臨國已二世矣好征戰與罽賓鬪三年不罷
人怨苦之有鬪象七百頭十人乘一象皆執兵仗象鼻
縛刀以戰所都城東南七里有佛塔高七十丈周三百
步卽所謂雀離佛國也

挹怛同

挹怛國都烏泚水南二百里大月氏之種也勝兵五六
萬俗善戰先時國亂突厥遣通設宋語強領其國俗同
吐火羅南去曹國千五百里東去瓜州六千五百里隋

大業中遣使來貢按劉璠梁典滑國姓噉噉後裔以姓
為國號轉訛又謂之挹怛焉其本高原或云是車師之種或云高原之種又韋節西
蕃記云親問其國人並自稱挹闐又按漢書陳湯征郅
支康居副王挹闐抄其後則此或康居之種類然傳自
遠國夷語訛舛年代綿邈莫知根實不可得而
辨也今考其風俗物產及諸家所說而編之

天竺

天竺後漢通焉即漢時身毒國

初張騫使大夏見邛竹杖蜀布問曰安得此大

夏人曰吾賈人往身毒國市之即天竺也或云摩伽陀或云婆羅門在葱嶺之南去月氏東南數千里地方三萬餘里其中分為五天竺一曰中天竺二曰東天竺三曰南天竺四曰西天竺五曰北天竺地各數千里城邑數百南天竺際大海北天竺距雪山山四周有山為壁南面一谷通為國門東天竺東際大海與扶南林邑鄰接但隔小海而已西天竺與罽賓波斯相接中天竺據四天竺之間國並有王漢時又有捐毒國去長安九千八

百里去都護治所二千八百里南與葱嶺相連北與烏孫接衣服類烏孫隨水草故塞種也顏師古云捐毒即身毒身毒則天竺塞種也從月氏高附國以西南至西釋種也蓋語音有輕重也

海東至盤起皆身毒之地有別城數百城置長有別國

數十國置王雖各小異而俱名身毒扶南傳云舍衛國隸屬天竺伽口國

一名波羅柰國一名皮波羅柰斯國竺法維佛國記云波羅柰國在伽維羅越國南千四百八十里釋法盛歷

國傳云其國有稍割牛其牛黑色角細長可四尺餘十日一割否則病或致死人服牛血皆老壽國人皆壽五百歲牛壽亦等於

都臨恒河一名伽毗黎河靈鷲山胡人亦天竺屬國

語曰耆闍崛山山有青石頭似鷲鳥竺法維佛國記云在摩竭提國南亦

天竺屬國也其時皆屬月氏月氏殺其王而置將令統其人

俗修浮圖道不殺生飲酒遂以成俗地卑濕暑熱其國

臨大水乘象而戰其人弱於月氏漢武帝遣使十餘輩
出西南指求身毒爲昆明所閉莫能通和帝時數遣使
貢獻後西域反畔乃絕桓帝延熹二年頻從日南徼外
來獻世傳明帝夢見金人長大頂有光明以問羣臣或
曰西方有神名曰佛其形長丈六尺而黃金色帝於是
遣使天竺問佛道法遂於中國圖畫形像焉楚王英始
信其術中國因此頗有奉其道者後桓帝好神數祀浮
圖老子百姓稍有奉者後遂盛魏晉世絕不復通唯吳
時扶南王范旃遣親人蘇勿使其國從扶南發投拘利
口循海大灣中正西北入歷灣邊數國可一年餘到天

竺江口逆水行七千里乃至焉天竺王驚曰海濱極遠
猶有此人乎卽令觀視國內仍差陳宋等二人以月支
馬四疋報旃勿積四年方至其時吳遣中郎康泰使扶
南及見陳宋等具問天竺土俗云佛道所興國也人敦
龐土饒沃其王號茂論所都城郭水泉分流繞於渠澗
下注大江其宮殿皆雕文鏤刻街曲市里屋舍樓觀鐘
鼓音樂服飾香華水陸通流百賈交會器玩珍瑋恣心
所欲左右嘉維舍衛葉波等十六大國去天竺或二二三
千里共尊奉之以爲在天地之中宋文帝元嘉五年天
竺伽毗黎國王月愛遣使奉表獻金剛指環摩勒金環

寶物赤白鸚鵡各一明帝泰始二年又遣使貢獻以其

使為建威將軍元嘉十八年蘇摩黎國王遣使獻方物

孝武孝建二年斤陀利國王遣長史獻金銀寶器後廢帝元徽元年婆黎國遣使貢獻此數國皆事佛道梁天監初天竺王屈

多遣長史竺羅達奉表獻瑠璃唾壺雜香吉貝等物國

臨大江新陶源出崑崙分為五江總名恒水其水甘美

下有真鹽色正白如水精後魏宣武時南天竺遣使來

獻駿馬云其國出獅子貂豹獾胡昆反橐駝犀象有火齊

如雲母而紫色裂之則薄如蟬翼積之則如紗縠之重

沓有金剛似紫石英百鍊不銷可以切玉璚瑁金銅鐵

鉛錫金縷織成金罽白疊毼毼毼音塔登音登有旃檀鬱金等

香甘蔗諸果石蜜胡椒薑黑鹽西與大秦安息交市海

中或至扶南交趾貿易多珊瑚珠璣琅玕俗無簿籍以

齒貝為貨尤工幻化丈夫致敬極者舐足摩踵而致其

詞家有音樂倡伎其王與大臣多服錦罽王為螺髻於

頂餘髮剪之使短丈夫剪髮穿耳垂璫俗皆徒跣衣重

白色怯於鬪戰有弓箭甲稍亦有飛梯地道木牛流馬

之法有文字善天文算歷之術其人皆學悉曇章書於

貝多樹葉以記事國中處處指曰佛故跡也信盟誓傳

禁呪能致龍起雨隋煬帝志通西域遣裴矩應接西蕃

諸國多有至者唯天竺不通帝以為恨天竺王姓乞利

乾隆十二年校刊 四裔十五

啞氏亦曰利利世有其國不篡殺稻歲四熟禾之長者
沒橐駝婦人項飾金銀珠纓絡死者燔骨取灰建宰堵
或委野中及河餌鳥獸魚鼈無喪紀謀反者幽殺之小
罪贖錢不孝者斷手足劓耳徙邊唐武德中國大亂王
尸羅逸多勒兵戰無前象不弛鞍士不釋甲因討四天
竺皆北面臣之會唐浮屠元奘至其國尸羅逸多召見
曰而國有聖人出作秦王破陣樂試爲我言其爲人元
奘粗言太宗神武平禍亂四夷賓服狀王喜曰我當東
面朝之貞觀十五年自稱摩伽陀王遣使者上書帝命
雲騎尉梁懷璠持節慰撫尸羅逸多驚問國人自古亦

有摩訶震旦使者至吾國乎皆曰無有戎言中國爲摩
訶震旦乃出迎膜拜受詔書戴之頂復遣使者隨入朝
詔尉衛丞李義表報之大臣郊迎傾都邑縱觀道上焚
香尸羅逸多率羣臣東面受詔書復獻火珠鬱金香提
樹二十二年遣右衛率府長史王元策使其國以蔣施
仁爲副未至尸羅逸多死國人亂其臣那伏帝阿羅那
順自立發兵拒元策時從騎纔數十戰不勝皆沒遂剽
諸國貢物元策挺身奔吐蕃西鄙檄召鄰國兵吐蕃以
兵千人來泥婆羅以七千騎來元策部分進戰茶磚和
羅城三日破之斬首三千級溺水死萬人阿羅那順委

國走合散兵復陣施仁擒之俘斬千計餘衆奉王妻息
阻乾陀衛江施仁擊之大潰獲其妃王子虜男女萬二
千人雜畜二萬降城邑五百八十所東天竺國王尸鳩
摩送牛馬三萬餽軍及弓刀寶纓絡迦沒路國獻異物
并上地圖諸老子像元策執阿羅那順獻闕下有司告
宗廟擢元策朝散大夫得方士那邏邇婆娑寐自言壽
二百歲有不死術帝改館使治丹命兵部尙書崔敦禮
護視使者馳天下採怪藥異石又使者走婆羅門諸國
所謂畔茶法水者出石臼中有石象人守之水有七種
色或熱或冷能銷草木金鐵人手入輒爛以橐駝鬪體

轉注瓠中有樹名咀賴羅葉如黎生窮山崖腹前有巨
虺守穴不可到欲取其葉者以方餗矢射枝則落爲羣
鳥啣去則又射乃得之其詭譎類如此後術不驗聽還
不能去死長安高宗時盧伽逸多者東天竺烏茶人亦
以術進拜懷化大將軍乾封三年五天竺皆來朝開元
時中天竺遣使者三至南天竺一獻五色能言鳥乞師
討大食吐蕃丐名其軍元宗詔賜懷德軍使者曰蕃夷
惟以袍帶爲寵帝以錦袍金革帶魚袋并七事賜之北
天竺一來朝乾元末河隴陷沒遂不復至周廣順三年
西天竺僧薩滿多等十六族來貢名馬宋乾德三年滄

州僧道圓自西域還得佛舍利一水晶器具葉梵經四十夾來獻道圓天福中詣西域在塗十二年住五印度凡六年五印度卽天竺也還經于闐與其使偕至太祖召問所歷風俗山川道里一一能記四年僧行勤等一百五十七人詣闕上言願至西域求佛書許之以其所歷甘沙伊肅等州焉耆龜茲于闐割祿等國又歷布路沙加濕彌羅等國並詔諭令人引導之開寶後天竺僧持梵夾來獻者不絕八年冬東印度王子穰結訛囉來朝貢天竺之法國王死太子襲位餘子皆出家爲僧不復居本國有曼殊室利者乃其王子隨中國僧至焉太

祖令館於相國寺善持律爲都人之所傾嚮財施盈溢衆頗嫉之以其不解唐言卽僞爲奏求還本國許之詔旣下曼殊室利始大驚恨衆僧諭以詔旨不得已遲留數月而後去自言詣南海附賈人船而歸終不知所適太平興國七年益州僧光遠至天竺以其王沒徙曩表來上上令天竺僧施護譯云近聞支那國內有大明王至聖至明威力自在每慙薄幸朝謁無由遙望支那起居聖躬萬福光遠來蒙賜金剛吉祥無畏坐釋迦聖像袈裟一事已披掛供養伏願支那皇帝福慧圓滿壽命延長常爲引導一切有情生死海中渡諸沉溺今以釋

迦舍利附光遠上進又譯其國僧統表詞意亦與沒徒
曩同施護者烏填曩國屬北印度西行十二日至乾陀
羅國又西行二十日至曩譏羅賀羅國又西行十日至
嵐婆國又西行十二日至譏惹曩國又西行至波斯國
得西海自北印度行百二十日至中印度中印度西行
三程至呵囉尾國又西行十二日至迦囉拏俱惹國又
西行十二日至摩羅尾國又西行二十日至烏然泥國
又西行二十五日至羅囉國又西行四十日至蘇羅茶
國又西行十一日至西海凡中印度行六月程至南印
度又西行九十日至供迦拏國又西行一日至海自南

印度南行六月程得南海皆施護之所述云八年僧法
遇自天竺取經回至三佛齊遇天竺僧彌摩羅失黎語
不多令附表願至中國譚經上優詔召之法遇復募緣
製龍寶蓋袈裟將復往天竺表乞給所經番國敕書遂
賜三佛齊國王遐至葛古羅國主司馬佶芒柯蘭國主
讚怛羅西天王子謨馱仙書以遣之雍熙中衛州僧辭
澣自西域還與胡僧密怛羅奉北印度王及金剛坐王
那爛陀書來又有婆羅門僧永世與波斯外道阿里煙
同至京師永世自言本國名利得國王姓牙羅五得名
阿喏你嚙衣黃衣戴金冠以七寶爲飾出乘象或肩輿

以音樂螺鈸前導多遊佛寺博施貧乏其妃曰摩訶伽
衣綉鏤金紅衣歲一出多所賑施人有寃抑俟王及妃
出遊卽迎隨申訴署國相有四人庶務並委裁制五穀
六畜果實與中國無異市易用銅錢有文漫圓徑如中
國之制但實其中心不穿貫耳其國東行經六月至大
食國又二月至西州又三月至夏州阿里煙自云本國
王號黑衣姓張名哩里没用錦綵爲衣每遊獵三二日
一還國署大臣九人治國事無錢貨以雜物貨易其國
東行經六月至婆羅門至道二年八月有天竺僧隨舶
至海岸持帝鐘鈴杵銅鈴各一佛像一軀貝葉梵書一
夾與之語不能曉天聖三年九年西印度僧愛賢智信
護等來獻梵書經各賜紫方袍束帶五年二月僧法吉
祥等五人以梵書來獻賜紫方袍景祐三年正月僧善
稱等九人貢梵經佛骨及銅牙菩薩像賜以束帛

石湖范氏吳船錄曰乾德二年詔沙門三百人入天
竺求舍利及貝多葉書有繼業三藏姓王氏耀州人
預遣中至開寶九年始歸寺所藏涅槃經一函四十
二卷業於每卷後分記西域行程雖不甚詳然地里
大畧可考世所罕見錄於此以備國史之闕業自階
州出塞西行由靈武西涼甘肅瓜沙等入伊吳

元用此吳

字高昌焉耆于闐疎勒大食諸國度雪嶺至布路州國又度大慈嶺雪山至伽濕彌羅國西登大山有薩陲太子投崖餉虎處遂王健他羅國謂之中印土又西至庶流波國及左攔陀羅國國有二寺又西過四大國至大曲女城南臨滔牟河北背洹河塔廟甚多而無僧尼又西二程有寶階故基又西至波羅柰國兩城相距五里南臨洹河又西北十許里至鹿野苑塔廟佛跡最夥業自云別有傳記今不傳矣南行十里渡洹河河南有大浮屠自鹿野苑西至摩羯提國館於漢寺寺多租入八村隸焉僧徒往來如歸南與

杖林山相直巍峯巋然山北有優波掬多石室及塔廟故基西南百里孤山名雞足三峯云是迦葉入定處又西北百里有菩提寶座城四門相望金剛座其中東向又東至尼連禪州東岸有石柱記佛舊事自菩提座東南五里至佛苦行處又西三里至三迦葉村及牧牛女池金剛座之北門外有獅子國伽藍又北五里至伽耶城又北十里至伽耶山云是佛說寶雲經處又自金剛座東北十五里至正覺山又東北三十里至骨磨城業館於蝦羅寺謂之南印土諸國僧多居之又東北四十里至王舍城東南五里有降

醉象塔又東北登大山細路盤紆有舍利子塔又臨
澗有下馬迎風塔度絕壑登山頂大塔廟云是七佛
說法處山北平地又有舍利本生塔其北山半日鷲
峯云是佛說法華經處山下卽王舍城城北山趾有
溫泉二十餘井又北有大寺及伽蘭陀竹園故跡又
東有阿難半身舍利塔溫湯之西有平地直南登山
腹有畢鉢羅窟業止其中誦經百日而去窟西復有
阿難證果塔此去新王舍城八里日往乞食會新王
舍城中有蘭若隸漢寺又有樹提迦故宅城其西有
輪王塔又北十五里有那爛陀寺寺之南北各數十

寺門皆西向其北有四佛座又東北十五里至烏巔
頭寺東南五里有聖觀自在像又東北十里至伽濕
彌羅寺寺南距漢寺八里許自漢寺東行十二里至
却提希山又東七十里有鴿寺西北五十里有支那
西寺古漢寺也西北百里至花氏城育王故都也自
此渡河北至毗耶離城有維摩方丈故跡又至拘尸
那城及多羅聚落踰大山數重至泥波羅國又至磨
逾里過雪嶺至三耶寺由故道自此入階州

摩揭它

那揭烏茶大食章求拔悉立附

摩揭它一曰摩伽陀本中天竺屬國環五十里土沃宜

稼穡有異稻巨粒號供大人米王居拘闔揭羅城或曰
俱蘇摩補羅曰波吒釐子城北瀕菟伽河唐貞觀二十
一年始遣使者自通於天子獻波羅樹樹類白楊太宗
遣使取熬糖法卽詔揚州上諸蔗柞瀋如其劑色味愈
西域遠甚高宗又遣王元策至其國摩訶菩提祠立碑
焉後德宗自製鐘銘賜那蘭陀祠又有那揭者亦屬國
也貞觀二十年遣使者貢方物烏茶者一曰烏萇直天
竺南地廣五十里東距勃律六百里西罽賓四百里山
谷相屬產金鐵葡萄鬱金香熟人柔詐善禁架術國
無刑殺抵死者放之窮山罪有疑飲以藥視溲清濁而

決輕重有五城王居術曹藥利城一曰曹揭釐城東北
有達麗羅川卽烏萇舊地貞觀十六年其王達摩因陀
訶斯遣使者獻龍腦香璽書優答大食與烏萇東鄙接
開元中數誘之其王與骨咄俱位二王不肯臣元宗命
使者冊爲王章求拔國或曰章揭拔本西羌種居悉立
西南四山中後徙山西與東天竺接衣服畧相類因附
之地袤八九百里勝兵二千人無城郭好鈔暴商旅患
之貞觀二十年其王羅利多菩伽因悉立國遣使入朝
元策之討中天竺發兵來赴有功由是職貢不絕悉立
當吐蕃西南戶五萬城邑多傍澗溪男子繒束頭衣羶

褐婦人辮髮短裙婚姻不以財聘其穀宜秬稻麥豆死者葬於野不封樹喪制爲黑衣滿年而除刑有剗常羈屬吐蕃

車離

車離後漢時通焉居沙奇城一名禮維持一名沛隸王在天竺東南三千餘里大國也其土氣物類與天竺同別城數十皆稱王其人怯弱地東西南北方數千里人皆長八尺乘象駱駝往來鄰國有寇乘象以戰

獅子國

獅子國東晉時通焉天竺旁國也在西海之中延袤二

千餘里多出奇寶其利和適無夏冬之異五種隨人所種不須時節其國舊無人止有鬼神有龍居之諸國商賈市易不見其形但珍寶明其所堪價商人依價取之諸國人聞其土樂因此競至或有停住者遂成大國能馴養神獅子遂以爲名風俗與婆羅門同而尤敬佛法安帝義熙初遣使獻玉佛像高四尺二寸玉色潔潤形制殊特殆非人工歷晉宋代在建康瓦官寺

先有徵士戴安道手

制佛像五軀及顧長康畫維摩詰并玉像時人謂三絕至齊東昏遂毀玉像前截臂次取身爲嬖妾潘貴妃作欽釧時咸宋文帝元嘉五年其王刹利摩訶南遣使貢

獻梁武帝大通元年後王迦葉伽羅訶黎耶亦遣使貢

獻杜環記獅子國亦曰新檀又曰婆羅門即南天竺也
國之北人盡胡貌秋夏災旱國之南人盡獠面四時
霖雨從此始有佛法寺
舍人皆僮耳布裹腰
唐總章三年遣使來貢天寶初
尸羅述伽再遣使獻大珠鈿金寶纓象齒白氈

高附非人工翬晉宋升并藝東武宮

高附後漢時通焉在大月氏西南亦大國也其俗似天

竺而弱善賈販內富於財所屬無常天竺罽賓安息三

國強即得之弱則失之後漢史云先未嘗屬月氏前漢

息及月氏破安息始得高附安

蘇不文獻通考卷第三百三十八蘇不

文獻通考卷第三百三十九蘇不

文獻通考卷第三百三十九

鄯 陽 馬 端 臨 貴 與 著

四裔考十六

大秦

大秦一名犁靬靬居言反一云前後漢時始通焉其國

在西海之西亦云海西國其王治安都城宮室皆以水

精為柱從條支西度海曲萬里去長安蓋四萬里其國

平正人居星布其地東西南北各數千里有四百餘城

小國役屬者數十西有大海海西有遲散城王城有官

曹簿領而文字習胡人皆髦頭而衣文繡亦有白蓋小

乾隆十二年校刊

車旌旗之屬又十里一亭三十里一墩一如中州地多
 師子遮害行旅不百餘人持兵器輒為所傷其王無常
 人皆循立賢者有災異及風雨不時輒廢而更立受放
 者無怨其人長大平正有類中國故謂之大秦或曰本
 中國人也玉有駭鷄犀抱朴子云通天犀有一白理如
 縵者以盛米置羣鷄中欲啄米
 至輒驚去故南人名為駭鷄也合會諸香煎其汁以為蘇合土多金銀
 奇寶夜光璧明月珠琥珀琉璃神龜白馬朱髦瑋瑁元
 熊赤璃辟毒鼠大貝車渠廣雅云車渠石似玉瑪瑙石似玉寶出西
 海有養者似狗多力獷惡贊藏宗反北附庸小邑有羊羔自
 然生於土中候其欲萌築牆護之恐獸所食也其臍與

地連割之絕則死擊物驚之遂絕逐水草無羣又有木
 難金翅鳥口中結沫所成碧色珠也土人珍之曹子建詩云珊

珊瑚間木難有幻人能額上為炎燼手中作江湖舉足而珠玉

自墮開口則播眊亂出前漢武帝遣使至安息安息獻犁軒幻人二皆蹙眉峭鼻亂髮

拳鬚長四尺五寸眊人志反有織成細布言用水羊毛名曰海西布

作瓊瓊毳毼罽帳之屬其色又鮮於海東諸國所作也
 又常利得中國縑素解以為胡綾紺紋數與安息諸胡

交市於海中西南漲海中可七八百里行到珊瑚洲水
 底有盤石珊瑚生其上大秦人常乘大船載鐵網令水
 工沒先入視之可下網乃下初生白而漸漸似苗坼甲

歷一歲許出網目間變作黃色支格交錯高極三四尺
大者圍尺餘三年色乃赤好復視之知可採便以鐵鈔
發其根乃以索繫網使人於船上絞車舉出還國理截
恣意所作若失時不舉便盡敗其國以金銀爲錢銀錢
十當金錢一其人質直市無二價穀食常賤國用富饒
鄰國使到其界首者乘驛詣王都至則給以金錢其王
常欲通使於漢而安息欲以漢繒綵與之交市故遮闔
不得自達又塗經大海商客往來皆賫三歲糧是以至
者稀桓帝元熹初大秦王安敦遣使自日南徼外獻象
牙犀角瑇瑁始乃一通焉其所表貢並無珍異疑傳者

隱之至晉武帝大康中其王遣使貢獻或云其國西有
弱水流沙近西王母所處幾於日所入也外國圖云從

名大秦其種長大身丈五六尺杜環行經記云拂菻國
有苦國西隔山數千里亦曰大秦其人顏色紅白男子
悉着素衣婦人皆服珠錦好飲酒尚乾餅多工巧善織
絡或有倅在諸國守死不改鄉風琉璃妙者天下莫比
王城方八十里四面境土各數千里勝兵約有百萬常
與大食相禦西枕西海南枕南海北接可薩突厥西海
中有市客主同和我往則彼去彼來則我歸賣者陳之
於前買者酬之於後皆以其直置諸物傍待領直然後
收物名曰鬼市又聞西有女國感水而生又云摩隣國
在秋薩羅國西南度大磧行二千里至其國其人黑其
俗獷少米麥無草木馬食乾魚人食鶻莽鶻莽卽波斯
棗也瘴癘特甚諸國陸行之所經山胡則一種法有數
般有大食法有大秦法有尋尋法其子親戚而作判
狄中最甚當食不語其大食法者以弟子親戚而作判
典縱有徵過不至相累不食猪狗驢馬等肉不拜國王
父母之尊不信鬼神祀天而已其俗每七日一假不買

賣不出納唯飲酒放浪終日其大秦善醫眼及痢或未病先見或開腦出蟲其國東南通交趾又水道通益州永昌郡多出異物大秦西海水西有河河西南流河西有南北山山西有赤水西有白玉山玉山西有西王母山玉爲堂室云從安息西界循海曲亦至大秦迴萬餘里於彼國觀日月星辰無異中國而前史云條支西行百里日入處失之遠矣唐貞觀十七年拂菻王波多力新唐書云拂菻卽古大秦也遣使獻赤玻璃綠金精下詔答賚大食強而伐之遂臣屬焉乾封至大定再朝獻開元七年因吐火羅大酋獻師子羚羊

小人

小人在大秦之南軀纒三尺其耕種之時懼鶴所食大秦每衛助之小人竭其珍以酬報

軒渠

軒渠其國多九色鳥青口綠頸紫翼紅膺紺頂丹足碧身細背元尾亦名九尾鳥亦名錦鳳其青多紅少謂之繡鸞常從弱水西來或云是西王母之禽也其國幣貨同三童國

三童

三童在軒渠國西南千里人皆服有三精珠或有四舌者能爲一種聲亦能俱語常貨多用蕉越犀象作金幣

率效國王之面亦效王后之面若丈夫交易則用國王
之面王死則更鑄已上三國與大秦隣接故附之

澤散

澤散魏時聞焉屬大秦其治在海中央北至驢分水行
半歲風疾時一月到最與安息城谷相近西南詣大秦
都不知里數

驢分

驢分魏時聞焉屬大秦其治去大秦都二千里從驢分
城西之大秦度海飛橋長二百四十里發海道西南繞
海道直西行至焉

堅昆

堅昆魏時聞焉在康居西勝兵二萬人隨水草畜牧多
貂有好馬

呼得

呼得魏時聞焉在葱嶺北烏孫西北康居東北勝兵萬
餘人隨畜牧出好馬亦多貂

丁令

丁令魏時聞焉在康居北勝兵六萬人隨畜牧出名鼠
皮白子青昆子皮此上三國堅昆中央俱去匈奴單于
庭安習水七千里南至車師六國五千里西南去康居

界二千里西去康居王治八千里或以爲此丁令卽匈奴北丁令也而此丁令在烏孫西似其種別也又匈奴北有屈射國有隔昆國有新犁國明北之南自復有丁令非烏孫西丁令也烏孫長老言北丁令有馬腦國其人聲音似鴈鶩從膝以上身至頭人也以下生毛馬腦馬蹄不騎馬而走疾於馬勇健敢戰

短人

短人魏時聞焉在康居西北男女皆長三尺人衆甚多去奄蔡諸國甚遠康居長老傳聞嘗有商旅行北方迷惑失道而到斯國中甚多真珠夜光明月珠見者不知

名此國號言以意商度此國去康居可萬餘里

突厥本末記云

突厥窟北馬行一月有短人國長者不踰三尺亦有二尺者頭少毛髮若羊胞之狀突厥呼爲羊胞頭國其傍無他種類相侵俗無寇盜但有大鳥高七八尺常伺短人啄而食之短人皆持弓矢以爲之備案此亦在西北卽魏畧云短人國是也

波斯

波斯後魏時通焉在達曷水之西都宿利城

後周史一蘇利城隋

史云蘇蘭城記錄音訛其實一也

有河經其城中南流卽條支之故地

也大月氏之別種其先有波斯匿王其子孫以王父字爲氏因爲國號焉王姓波斯戶十餘萬東去中國萬餘里西去海數百里東南去穆國四千餘里西北至拂菻

四千五百里有樓觀屋宇佛寺城西十五里有土山山
周迴高大其勢連接甚遠中有鷲鳥噉羊土人極以爲
患其王坐金羊座戴金花冠衣錦袍織成帔飾以眞珠
寶物其俗丈夫剪髮戴白皮帽貫頭衫兩肩近下開之
并布布帔緣以織成婦人服大衫帔仍貫五色珠絡之
於膊王卽位以後擇諸子內賢者密書其名封之於庫
諸子及大臣皆莫之知也王死衆乃共發書視之其封
內有名者卽立以爲王餘子各出就邊任兄弟更不相
見也國人號王曰醫噴才割反妃曰陟率王之諸子曰殺
野其刑法重罪懸諸竿射而殺之次則繫獄新王立乃

釋之賦稅准地輸銀錢事火神天神婚合不擇尊卑於
諸夷中最爲醜穢死者多棄尸於山一月治服城外有
人別居唯知喪葬之事號爲不淨人若入城市搖鈴自
別以六月爲歲首氣候暑熱家自藏冰其地多砂磧引
水溉灌其五穀及禽獸與中州畧同唯無稻黍土出名
馬及駝富室至有數千頭者出象師子多良犬有大鳥
形如橐駝有兩翼飛而不能高食草與肉亦能噉人有
大鳥卵眞珠玻璃珊瑚琉璃瑪瑙水精瑟瑟金銀鍮石
金剛火齊銅錫鑛鐵朱砂水銀錦疊細布氍毹毼毼護
那越諾布金縷織成赤麋皮薰陸鬱金蘇合青木等香

胡椒葦撥石蜜千年棗香附子訶黎勒無食子鹽綠雌黃又有優鉢曇花鮮華可愛地有鹹池俗尊右下左祠天地日月水火戰乘象一象士百人負則盡殺叛者鐵灼其舌瘡白爲直黑爲曲魏神龜中其國遣使上書貢物云大國天子天之所生願日出處常爲漢中天子波斯國王居和多千萬敬拜朝廷嘉納之自此每使朝獻恭帝二年其王又遣使獻方物梁中大通二年始通江左遣使獻佛牙隋煬帝時遣雲騎尉李昱使通波斯尋有使隨昱貢方物隋末西突厥葉護可汗討殘其國而不能有唐貞觀十二年遣使朝貢又獻活禱蛇狀類鼠

色正青長八九寸能入穴取鼠後其王爲大酋所逐大食復攻之遣使告難高宗以遠不可師謝遣龍朔初又訴爲大食所侵時天子遣使到西域分置州縣以疾陵城爲波斯都督府拜其王爲都督俄爲大食所滅雖不能國咸亨中猶入朝授右武衛將軍死始其子泥涅師爲質調露元年詔裴行儉將兵護還將復王其國以道遠至安西碎葉行儉還泥涅師因客吐火羅二十年部落益離散景龍初復來朝授左威衛將軍病死西部獨存開元天寶間遣使者十輩獻瑪瑙牀火毛繡舞筵乾元初從大食襲廣州焚倉庫廬舍浮海走大歷時復來

獻又有陀拔斯單者或曰陀拔薩憚其國三面阻山北
瀕小海居婆里城世爲波斯東大將波斯滅不能臣大
食天寶五載王忽魯汗遣使入朝封爲歸信王後八年
遣子自會羅來朝拜右武衛員外中郎將賜紫袍金魚
留宿衛爲黑衣大食所滅貞觀後遠小國君遣使來朝
獻有司未嘗參考本末者今附之左方曰火辭彌與波
斯接貞觀十八年與摩羅游使者偕朝二十一年有健
達王獻佛土菜莖五葉赤華紫須龍朔元年多福王難
婆脩疆宜說遣使者來朝總章元年有末陀提王開元
五年有習阿薩般王安殺並遣使來朝貢七年訶毘施

王撩塞因吐火羅大會羅摩獻獅子五色鸚鵡天寶時
來朝者曰俱爛那曰舍摩曰威遠曰蘇吉利發屋闌曰
蘇利息單曰建成曰新城曰俱位凡八國俱位或曰商
彌治阿賒颯師多城在大雪山勃律河北地寒有五穀
蒲萄石榴冬窟室國人常助小勃律爲中國候新城之
國在石東北羸百里有弩室羯城亦曰新城曰小石國
城後爲葛邏祿所并

悅般

悅般國在烏孫西北其先匈奴北單于之部落爲漢車
騎將軍竇憲所逐北單于度金微山西走康居其羸弱

不能去者住龜茲北地方數千里衆可二十餘萬涼州人猶謂之單于王其風俗言語與高車同而其人清潔於胡俗剪髮齊眉以飾餽塗之昱昱然光澤日三澡漱然後飲食其國南界有火山山傍石皆焦鎔流地數十里乃凝堅人取以爲藥卽石流黃也與蠕蠕結好其王嘗將數千人入蠕蠕國欲與大檀相見入其界百餘里見其部人不浣衣不紮髮不洗手婦人口舐器物王謂其從臣曰汝曹誑我將我入此狗國中乃馳還大檀遣騎追之不及自是相仇讐數相征討魏太平眞君九年遣使朝獻并送幻人稱能割人喉脉令斷擊人頭令骨

陷皆血出或數升或盈斗以草藥納其口中令嚼咽之須臾血止養瘡一月復常又無痕瘢世疑其虛乃取死罪囚試之皆驗云中國諸名山皆有此草乃使人受其術而厚遇之又言其國有大術者蠕蠕來抄掠術人能作霖雨盲風大雪及行潦蠕蠕凍死漂亡者十二三是歲再遣使朝貢求與官軍東西齊契討蠕蠕太武嘉其意命中外諸軍戒嚴以淮南王他爲前鋒襲蠕蠕仍詔有司以其鼓舞之節施於樂府自是每使朝貢

伏盧尼

伏盧尼後魏時通焉治伏盧尼城在波斯國西北有大

河南流中有鳥其形似人亦有似橐駝馬者皆有翼常居水中出水便死城北有云尼山出銀珊瑚琥珀多師子

朱俱波

朱俱波後魏時通焉亦名朱居槃國漢子合國也今并有之漢西夜蒲犁依耐得若四國之地在于闐國西千餘里其西至渴槃國南至女國三千里北至踈勒九百里南至葱嶺二百里其王本踈勒國人魏畧西戎傳曰西夜并屬踈勒宣武永平中朱居槃國遣使朝貢其人言語與于闐相似其間小異人貌多同華夏亦類踈勒唐武德以後頻

遣使朝貢

渴槃陀

渴槃陀後魏時通焉亦名漢陀國亦名渴羅陀國治葱嶺中在朱俱波國西至護密國其南至懸度山無定界北至踈勒國界西北至判汗國其王本踈勒人累代相承以居此國有戶二千餘懸度山在國西南四百里懸度者石山也谿谷不通以繩索相引而度其間四百里中往往有棧道因以爲名今按懸度葱嶺迤邐相屬郵置所絕道阻且長故行人由之莫能分別然法顯宋雲所經卽懸度山也又有頭痛山在國西南鄉罽賓歷大

頭痛小頭痛之山赤土身熱之阪宋膺異物志云大頭

搜之東踈勒之西經之者身熱頭痛夏不可行行則致死唯冬可行尚嘔吐山有毒藥氣之所為也冬乃枯歇

故可行也其葱嶺俗號極嶷山今按葱嶺周環其國衣服人

貌語音與于闐相似其間多有異者書與婆羅門同國

中咸事佛人山居勁健雜人多而胡少有音樂兵器有

甲弰弓刀國法殺人劫賊者死餘徵罰其稅雜輸之服

飾婚姻同踈勒王坐金牀死者埋殯七日為孝太武帝

大延三年朝獻於後不絕

粟弋

粟弋後魏通焉在葱嶺大國一名粟特一名特拘夢出

好馬牛羊蒲萄諸果出美蒲萄酒其土地水美故也出

大禾高丈餘子如胡豆在安息北五千里附庸小國四

百餘城太武時遣使朝貢

阿鈎羌

阿鈎羌後魏通焉在莎車西南國西有懸度山其間四

百里中往往有棧道下臨不測之淵人行以繩索相持

而度土有五穀諸果市用錢為貨居止立宮室有兵器

副貨

副貨後魏通焉東至阿富汗使且國西至沒誰國中間相

去千里南有連山不知名北至奇沙國相去千五百里

宜五穀蒲萄唯有駝驪國王有黃金殿殿下有金駝七頭各高三尺孝文帝時其王遣使朝貢

疊伏羅

疊伏羅後魏通焉去代三萬一千里國中有勿悉城城北有彊奇水西流有白象土宜五穀宣武帝時遣使貢方物

石國

石國隋時通焉居於藥殺水都柘折城方千餘里本漢大宛北鄙之地東與北至西突厥界西至波臘國界西南至康居界南至率都沙那國界王姓石國城之東南

立屋置座於中正月六日七月十五日以王父母燒餘之骨金甕盛之置於床上巡繞而行散以香花雜果王率臣下設祭焉禮終王與夫人出就別帳臣下以次列坐而饗宴有粟麥多良馬南去鑿汗音撥六百里東南去

瓜州六千里嘗貳於突厥射匱可汗滅之令特勒旬攝其國事隋大業五年遣使朝貢唐武德貞觀間數獻方物顯慶三年以瞰羯城爲大宛都督府授其王都督開元初封其君長爲石國王二十八年又冊順義王明年其王上言今突厥已屬天可汗惟大食爲諸國患請討之天子不許天寶初封王子那俱車鼻施爲懷化王賜

鐵券久之安西節度使高仙芝劾其無蕃臣禮請討之
王約降仙芝遣使者護送至開遠門斬闕下於是皆怨

王子走大食乞兵攻怛邏斯城敗仙芝軍自是臣大食

寶應時遣使朝貢杜環經行記云其國城一名赭支一名大宛天寶中鎮西節度使高仙芝

禽其王及妻子歸京師國中有二水一名真珠河一名

質河並西北流土地平敞多果實出好犬良馬又云碎

葉國從安西西北千餘里有勃達嶺南是葱嶺二千餘里其水嶺

嶺北是突厥騎施南界西南至葱嶺二千餘里其水嶺

南流者盡過中國而歸東海嶺北流者盡歸胡境而入

北海又北行數日度雪海其海在山中春夏常雨雪故

日雪海有細道道傍往往有冰孔嵌空萬仞轉墮者莫

知數在勃達嶺北行千餘里至碎葉川其川東頭有熱

海茲地寒而不凍故曰熱海又有碎葉城天寶七載北

庭節度使王正見薄伐城壁摧毀邑居零落昔交河公

主所居止之處建大雲寺猶存其川西接石國約長千

餘里中有異姓部落有異姓突厥各有兵馬數萬城堡

東女

周雜曰尋干戈凡是農人皆擐甲胄專相虜掠以為奴
婢其川西頭有城曰怛羅斯石國人鎮即天寶十載高
仙芝軍敗之地從此至西海以來自三月至九月天無
雲雨皆以雪水種田宜大麥小麥稻禾豌豆飲蒲
萄酒糜酒醋乳

東女亦曰蘇伐刺拏瞿咀羅羌別種也西海亦有女自

王故稱東別之東與吐蕃党項茂州接西屬三波訶北

距于闐東南屬雅州羅女蠻白狼夷東西行盡九日南

北行盡二十日有八十城以女為君居康延川巖險四

繚有弱水南流縫革為船戶四萬勝兵萬人王號賓就

官曰高霸黎猶言宰相也官在外者率男子為之凡號

令女官自內傳男官受而行之王侍女數百五日一聽
政王死以金錢數萬納王族求淑女立之凡二次爲小
王王死因以爲嗣或姑死婦繼無篡奪所居皆重屋王
九層國人六層王服青毛綾裙被青袞袖委於地冬羊
裘飾以文錦爲小鬟髻耳垂瑠足曳鞞履俗輕男子女
貴者咸有侍男被髮以青塗面惟務戰與耕而已子從
母姓地寒宜麥畜羊馬出黃金風俗大與天竺同以十
一月爲正巫者以十月詣山中布糴麥咒呼羣鳥俄有
鳥來如雞狀剖視之有穀者歲豐否卽有災名曰鳥卜
居喪三年不易服不櫛沐貴人死剝葬其皮肉骨甕之

糝金屑瘞之葬殉者至數十人隋開皇六年遣使朝貢
唐武德時王湯滂氏始遣使入貢高祖厚報爲突厥所
掠不得通貞觀中使復至太宗璽制慰撫顯慶初遣高
霸黎文興王子三盧來朝授右監門中郎將其王斂臂
使大臣來請官號武后冊拜斂臂左玉鈐衛員外將軍
賜瑞錦服天授開元間王及子再來朝詔與宰相宴曲
江封王曳夫爲歸昌王左金吾衛大將軍後乃以男子
爲王貞元九年其王湯立悉與白狗君及哥隣君董卧
庭逋租君鄧吉知南水君薛尚悉曩弱水君董避和悉
董君湯悉贊清遠君蘇唐磨咄霸君董義蓬皆詣劔南

韋臯求內附其種散居西山弱水雖自謂王蓋小小部落耳自失河隴悉爲吐蕃羈屬部數千戶輒置令歲督絲絮至是猶上天寶所賜詔書臯處其衆於維霸等州賜牛糧治生業立悉等入朝差賜官祿於是松州羌二萬口相踵入附立悉等官刺史皆得世襲然陰附吐蕃故謂之兩面羌

西女

西女國在葱嶺之西其俗與東女畧同種皆女子多珍貨附拂菻君長歲遣男子配焉俗產男子不舉唐貞觀八年朝貢使至

吐火羅

吐火羅一名土壑宜後魏時吐呼羅國也隋時通焉都葱嶺西五百里在烏滸河南卽媯水也與挹怛雜居勝兵十萬人皆習戰俗奉佛多男少婦人故兄弟通室婦人五夫則首戴五角十夫戴十角男子無兄弟者則與他人結爲昆季方始得妻不然終身無婦矣生子屬其長兄被服文字與于闐畧同城北有玻璃山南崖穴中有神馬國人每牧馬於其側時產名駒皆汗血焉其北界則漢時大宛之地南去曹國千七百里東去瓜州六千七百里大業中遣使來貢唐初屬西突厥高宗永徽

初遣使獻大鳥高七尺其色元足如駝鼓翅而行日三百里能噉鐵夷俗謂駝鳥龍朔元年吐火羅置州縣使王名遠進西域圖記并請于闐以西波斯以東十六國分置都督府及州八十縣一百軍府一百二十六仍於吐火羅立碑以紀聖德帝從之開元天寶間數獻馬騾異藥乾陀婆羅二百品紅碧玻璃乃冊其君骨咄祿頓達度爲吐火羅葉挹怛王其後隣胡羯師謀引吐蕃攻吐火羅於是葉護失里忙伽羅丐安西兵助討帝爲出師破之乾元初與西域九國發兵爲天子討賊肅宗詔隸朔方行營

劫國

劫國隋時聞焉在葱嶺中西與南俱與賒彌國界接西北至挹怛國去長安萬二千里有戶數萬氣候熱有稻麥粟豆羊馬出洛沙青黛婚姻同突厥死亡棄於山唐武德二年遣使貢寶帶金鑲玻璃水精盃各一玻璃四百九十枚大者如棗小者如酸棗

隋羅伊羅

隋羅伊羅隋時聞焉在烏茶國北大雪山坡上緣梯登山接七百梯方到其國

越底延

越底延國隋時聞焉治辛頭河北南至婆羅門國三千
里西北至賒彌國千餘里東北至瓜州五千四百里其
王婆羅門種類戶數萬有弓矢刀稍皮甲國法不殺人
重罪流輕者杖國無課稅其俗事佛書同婆羅門王及
庶人翦髮衣錦袍不開縫貧者衣白疊婦人爲髻衣裙
衫帔長巾俗清潔氣候溫多稻有羊馬多牛出鋤石訶
黎勒石蜜麋皮細疊

大食

大食唐永徽中遣使朝貢云其國在波斯之西或云初
有波斯胡人若有神助得刀殺人因招附諸胡有胡人

十一來據次弟摩首受化爲王此後衆漸歸附遂滅波
斯又破拂菻及婆羅門城所當無敵兵衆有四十二萬
有國以來三十四年矣初王已死次傳第一摩首者今
王卽是第三其王姓大食其國男夫鼻大而長瘦黑多
須鬢以婆羅門婦女多端麗亦有文學與波斯不同出
駝馬驢騾殺羊等土多砂石不堪耕種無五穀唯食駝
象等肉破波斯拂菻始有米麵敬事天神又云其王嘗
遣人乘船將衣糧入海經涉八年未極西岸於海中見
一方石石上有樹枝赤葉青樹上總生小兒長六七寸
見人不語而皆能笑動其手脚頭着樹枝人摘取入手

卽乾黑其使得一枝還今在大食王處

杜環經行記云

大食王號暮門都此處其士女瓌偉壯大衣裳鮮潔容
止閑麗女子出門必擁蔽其面無問貴賤一日五時禮
天食肉作齋以殺生為功德繫銀帶佩銀刀斷飲酒禁
音樂人相爭者不至毆擊又有禮堂容數萬人每七日
王出禮拜登高為眾說法曰人生甚難一天道不易奸非
劫竊細行謾言安已危人欺貧虐賤有一於此罪莫大
焉凡有征戰為敵所戮必得生天殺其敵一獲福無量
率土稟化從之如流法唯從寬葬唯從儉郭郭之內里
開之中土地所生無物不有四方輻輳萬貨豐賤錦綉
珠貝滿於市肆駝馬驢騾充於街巷刻石蜜為廬舍有
似中國寶輦每至節日將獻貴人琉璃器皿鑰石瓶鉢
蓋不可算數梗米白麵不異中華其果有偏桃又千年
棗其蔓菁根大如斗而圓味甚美餘菜亦與諸國同蒲
萄大者如雞子香油貴者有二一名查塞蒲孔反一名葵
女甲反師香草貴者有二一名查塞蒲孔反一名葵
蘆荛稜緞機杼金銀匠畫匠漢匠起作畫者京兆人樊
淑劉泚織絡者河東人樂隈呂禮又以橐駝駕車其馬
俗云西海濱龍與馬交所產也腹肚小脚腕長善者日

走千里其駝小而緊背有孤峯良者日馳千里又有駝
鳥高四尺以上脚似駝蹄頸項勝得人騎行五六里有
卯大如三升又有薺樹實如夏棗堪作油食除瘴其氣
候温土地無冰雪人多瘡痲一年之內十中五死今吞
滅四五國皆為所役屬多分其兵鎮守其境盡於西
海焉又云米祿國在亞梅國西南七百餘里胡姓米者
茲土人也其城方十五里用鐵為城門城中有鹽池又
有兩所佛寺其境東西四百四十里南北百八十里村
連接樹木交映四面合匝摠是流沙南有大河流入其
境分渠數百灌溉一川其土沃饒其人淨潔墻宇高厚
市廛平正木既雕刻土亦繪畫又有細軟疊布羔羊皮
裘估其上者直銀錢數百果有紅桃白棗暹白黃李瓜
大者名尋支十餘人食一顆輒足越瓜長四尺以上菜
有蔓菁蘿蔔長葱類葱芸薑胡瓜藍單達茴香英薤
瓠蘆尤多蒲萄又有黃牛野馬水鴨石鷄其俗以五月
為歲每歲以畫缸相獻有打毬節鞞節其大食東道
使鎮於此從此至西海以來大食波斯參雜居止其俗
禮天不食自死肉及宿肉以香油塗髮又云苦國在大
食西界周迴數千里造屋兼瓦壘石為壁米穀殊賤有
大川東流入亞俱羅商客羅此糶彼往來相繼人多魁

乾隆十二年校刊

四裔十六

梧衣裳寬大有似儒服其苦國有五節度有兵馬一萬
以上北接可薩突厥可薩北又有突厥足似牛蹄好噉
肉開元初復遣使獻馬鈿帶謁見不拜有司將劾之中
書令張說謂殊俗慕義不可寘於罪元宗赦之使者又
來辭曰國人止拜天見王無拜也有司切責乃拜十四
年遣使蘇黎滿獻方物拜果毅賜緋袍帶或曰大食族
中有孤列種世酋長號白衣大食種有二姓一曰盆尼
末換二曰奚深有摩訶末者勇而智衆立爲主闢地三
千里克夏臘城傳十四世至末換殺兄伊疾自王下怨
其忍有呼羅柵木鹿人並波悉林將討之徇衆曰助我
者皆黑衣俄而衆數萬卽殺末換求奚深種孫阿蒲羅

拔爲王更號黑衣大食蒲羅死弟阿蒲恭拂立至德初
遣使者朝貢代宗取其兵平兩京阿蒲恭拂死子迷地
立死弟訶論立貞元時與吐蕃相攻吐蕃歲西師故鮮
盜邊十四年遣使者含塞烏雞沙北三人朝皆拜中郎
將賚遣之宋乾德四年僧行勤游西域因賜王書以招
懷之開寶元年遣使來朝貢四年又貢方物以其使李
訶末爲懷化將軍特以金花五色綾紙寫官誥以賜是
年本國及占城闍婆又致貢物於李煜煜不敢受遣使
來上因詔今後勿以爲獻六年遣使來貢方物七年九
年皆遣使入貢太平興國二年遣使貢方物其從者目

深體黑謂之崑崙奴詔賜其使襲衣器幣從者縑帛有
差四年復有朝貢使至雍正二年國人花茶復來獻花
綿越諾揀香白龍腦白沙糖薔薇水琉璃器淳化四年
又遣其副蕃長李亞勿來貢其國舶主蒲希密至南海
以老病不能詣闕乃以方物附亞勿來獻希密進象牙
乳香鑛鐵紅絲吉貝五色雜花蕃錦白越諾琉璃瓶無
名異薔薇水等詔賜希密敕書錦袍銀帶束帛以答之
至道元年其國舶主蒲押隄黎齎蒲希密表獻白龍腦
膾腠臍龍鹽眼藥白沙糖千年棗五味子偏桃薔薇水
乳香山子蕃錦駝馬褥面白越諾引對於崇政殿譯者

代奏云父蒲希密因緣射利泛舶至廣州逮今五稔未
歸母令臣遠來尋訪昨至廣州見之具言前歲蒙皇帝
聖恩降赦書賜以法錦袍紫綾纏頭間塗金銀鳳瓶一
對綾絹二十疋今令臣奉章來謝以方物致貢太宗因
問其國對云與大秦國相隣爲其統屬今本國所管之
民裁及數千有都城界山海間又問其山澤所出對云
唯犀象香藥問犀象以何法可取對云象用象媒誘致
漸以大繩羈縻之耳犀則使人升大樹操弓矢伺其至
射而殺之其小者不用弓矢可以捕獲上賜以襲衣冠
帶被褥等物令閣門宴犒訖就館延留數月遣回降詔

答賜蒲希密黃金準其所貢之直三年二月又與賓同隴國使來朝咸平二年又遣判官文戍至三年舶主陀羅離遣使穆吉鼻來貢吉鼻還賜陀羅離詔書并器服鞍馬六年又遣使婆欽羅三摩尼等對於崇政殿持真珠以進自云離國日誠願得瞻威顏卽獻此乞不給回賜真宗不欲違其意俟其還優加恩賚景德元年又遣使來時與三佛齊蒲端國使並在京師會上元觀燈皆賜錢縱其宴飲其年秋蕃客蒲加心至四年又遣使同占城使來優加館餼之禮許徧至苑囿寺觀遊覽太中祥符元年十月車駕東封陁婆離上言願執方物赴泰

山從之自國初以來數入貢路繇沙州涉夏國抵秦州乾興初趙德明請道其國中不許至天聖元年來貢恐爲西人鈔掠乃詔自今取海路繇廣州至京師至和嘉祐間四貢方物最後以其首領蒲沙乙爲武寧司階每入貢朝廷視其物多寡加賜答之以進奉蕃官爲郎將熙寧中其使辛押陀乞統察蕃長司公事詔廣州裁度又進錢銀助修廣州城不許六年都蕃首保順郎將蒲陀婆離慈表令男麻勿奉貢物乞以自代而求爲將軍詔但授麻勿郎將其國部屬各異名故有勿延有陀婆離有俞盧和地有麻囉拔等國然皆冠以大食勿延所

貢又有龍腦批羅綿毬錦襪番花簞隨婆有金飾壽帶
連環鈎臂數珠之屬政和中橫州土曹蔡蒙休押伴其
使入都沿道故滯留強市其香藥不償直事聞詔提點
刑獄置獄推治因詔自今蕃夷入貢並選承務郎以上
清強官押伴按程而行無故不得過一日乞取賈市者
以自盜論其國在泉州西北自泉州發船四十餘日至
藍里博易住冬次年再發順風六十餘日方至其國本
國所產多運載與三佛齊貿易商賈轉販以至中國其
國雄壯其地廣袤民俗侈麗甲於諸蕃天氣多寒雪厚
二三尺故貴氊毬國據諸蕃衝要其王錦衣玉帶躡

金履朔望則戴百寶純金冠其居以瑪瑙爲柱綠甘爲
壁水晶爲瓦礫石爲磚活石爲灰帷幕之屬悉用百花
錦官有丞相太尉各領兵馬二萬餘人馬高七尺士卒
驍勇民居屋宇與中國同但瓦則以薄石爲之市肆誼
譁金銀綾錦之屬種種而聚技巧咸精建炎三年張浚
奏大食國遣使進奉珠玉寶貝等物已至熙州上宣諭
曰大觀宣和間茶馬之政廢川茶不以博馬惟市珠玉
故馬政浸缺武備不脩致胡虜亂華危弱之甚今若復
損數十萬緡貿易無用珠玉曷若惜財以養戰士宜以
禮贈賄而謝遣之乃詔張浚並不得受量度支賜以答

遠人之意紹興元年六年俱以船舶入貢乾道四年進貢方物初遣使賫寶貝象牙乳香等入貢舟至占城爲所奪訴於福建市舶上令以禮遣回開禧間遣使入貢

拂菻

拂菻國南東至滅力沙北至海皆四十程西至海三十程東自西大食及于闐回紇達鞞青唐乃抵中國歷代未嘗朝貢至宋元豐四年十月其王滅力沙靈改撒始遣大首領你厮都令厮孟判來獻鞍馬刀劍真珠言其國地甚寒土屋無瓦產金銀珠胡錦牛羊馬獨峯駝梨杏千年棗巴攬粟麥以蒲萄釀酒樂有箜篌胡琴小篳

篳偏鼓王服紅黃衣以金線織絲布纏頭歲三月則詣佛寺坐紅床使人舁之貴人如王之服或青綠緋白粉紅褐紫並纏頭跨馬城市田野皆有首領主之每歲唯夏秋兩得俸給金錢錦縠帛以治事大小爲差刑罰罪輕者杖數百重者至二百大罪則盛以毛囊投諸海不尚鬪戰鄰國小有爭但以文字往來相詰問事大亦出兵鑄金銀爲錢無穿孔面鑿彌勒佛皆爲王名禁民私造元祐六年其使兩至詔別賜其王帛二百疋白金餅對衣金束帶

按唐史有拂菻國以爲卽古大秦也然大秦自後

漢始通中國歷晉唐貢獻不廢而宋四朝史拂菻傳則以爲其國歷代未嘗朝貢至元豐時始遣使入獻方物今以三史兩拂菻傳參之唐傳言其國西瀕大海宋傳則言西至海尚三千程而餘界亦齟齬不合土產風俗亦不同恐是其名偶同而非大秦也今故以唐之拂菻附入大秦而此拂菻自爲一國云

遼黎

遼黎國宋元祐四年般次冷夷四抹粟迷等齎于闐國黑汗王并本國王表章來有司以其國未嘗入貢請視

于闐條式從之

文獻通考卷第二百二十九



